

ASO LULU, 27 IANUARI 2021

Na nofoia e le Sui Fofoga Fetalai le Nofoa i le itula e 9:22 i le taeao, e tusa ai ma Tulafono Tumau 27(1).

Tatalo.

SUI FOFOGA FETALAI: Ou te faasilasila atu ua toe amatalia nei Taulumaga o le Fono Aoaofa Fofoga.

Ou te manatu o se avanoa lelei foi e faailoa ai i le paia maua o le Palemene, e faapea foi le faafoga tapuai a Samoa, ua fou foi la outou silasila i leni taeao i le Afioga i le Fofoga Fetalai, ona ua le maua le malosi, i nisi o tuatua faaleaiga, o le ala lea ua outou le silasila i ai e pei ona masani ai. Ae i ai le faamoemoe o le aso a taeao e toe faaauau ai taulumaga o le Fono Aoaofa Fofoga e le Afioga i le Fofoga Fetalai filifilia o le Malo Tutoatasi o Samoa.

Ae avea foi leni avanoa ou te faafeiloai ma faatalofa atu i le paia maua o le Palemene, i le afio mai o lau Afioga i le Taitai o le Maota, lau Afioga i le Palemia ae faapea foi le Aiga Minisita, Sui Minisita, ma sui usufono mamalu uma o le Palemene. Malo le soifua, malo foi le tauatai, o lea ua tatou feiloai i manu ae le o mala i leni taeao. Faafetai i le Atua i Lana tausiga i lo outou soifua ma lo tatou ola.

Ia, e faatalofa foi i le tapuaiga mamalu a lo tatou atunuu, tapuai maia, o lea o le a alo le Palemene i lana Fonotaga o leni aso ia iu ma le manuia mea uma ona o lau tapuaiga.

TULAFONO TAU FAAOFI O LE FAATATAUINA O TUPE FAAOPOPO (NU.1) 2020/2021 – felafolafoaiga faaauau i luga o le faitauga faalua – Aso 6

SUI FOFOGA FETALAI: E tolopo Galuega a le Fono Aoaofa i le aso Fono ananafi o lo o saunoa le sui usufono mo le itumalo faaalaalafaga o Vaimauga Sisifo Nu.1. Ou te tapa ai ma le faaloalo lau Afioga i le sui usufono mo Vaimauga Sisifo Nu.1 e faaauau lau saunoaga.

Tofa LENATAI VICTOR FAAFOI TAMAPUA (Vaimauga Sisifo Nu.1): Faamalo faafetai i lau Afioga i le Fofoga Fetalai i leni taeao. Ia, ou

te talitonu o lea ua nofofale ia Sa-Tui ia Maa faapea le aai o finagalo le faamanu ma le faafetai i le Atua e pei ona e manavaina, e tomatuina ai leni taeao fou ua tatou aulia i le alofa ma le agalelei o le Atua. E le gata i lea, nono ni manu aua se manuia o Samoa, aemaise lana Faigamalo. Faamalo faafetai.

E faatalofa atu i leni taeao i lau Afioga i le Palemia ma le nofo a Minisita, Minisita Lagolago, tainane lau Afioga i le Fofoga o le Maota ma sui usufono o le Palemene o Samoa.

E faatalofa atu foi i lau Susuga i le Failautusi ma le Ofisa o le Fono Aoa, tainane foi Ofisa Sili o Pulega, Ofisa Sinia, Matagaluega ma Faalapotopotoga uma a le tatou Malo.

E faatalofa atu foi i le tapuaiga mamalu a le tatou atunuu o lo o faapena ona faafogafoga mai, aemaise si ou itumalo pele o Vaimauga Sisifo Nu.1. Ia, lau Afioga i le Fofoga Fetalai, ae le i amata atu se faaauauina o se faamatalaga, e muamua ona ou soso atu ma le agaga mauualalo i lou nofoa pule ona o lo o i ai foi nisi o tuatuagia e fia auai, ne i i ai se taimi tagai mai lau Afioga e le o nofoia lo matou nofoa, ona o le aso o lo o faataunuu ai toe sauniga o se tasi o tina o le matou nei aiga, le tina ia Marie Tolo Sililoto. Ma le faaaloalo lava.

Lau Afioga, ae le i faaauauina foi le lauga, e toe fia foi tasi lava i tua i se tasi o vaega o lea sa taua i lau lauga i le aso ananafi, ona o le tetele o timuga. Ia, e talitonu sa faapena ona molimauina foi e le tatou Maota aemaise foi le atunuu le tetele foi o timuga i le aso ananafi, o lea foi sa faaletonu ai le vaega lea o si o matou itumalo, o lea sa ou taua i le aso ananafi i Lelata, ua sao ma pa mai ai le vai ona faasolo mai foi lea i Faatoia ma agai mai lea i nisi o vaega, agai atu i le Apia Park, Vaiala ma Vaipuna. Ia, e pei o le toe soso atu lea ma le agaga mauualalo e pei ona tuuina atu i le aso ananafi, faamolemole pe mafai ona tuuina atu se fesoasoani vave mo lea vaega, ona o le taimi e touulu mai ai timuga, na o le popole lava o nai aiga o lo o faapena ona nofoia vaega ia o lo o manaomia tele ai le fesoasoani. Ma le faaaloalo lava.

Lau Afioga i le Fofoga Fetalai, e maea se faamatalaga i le aso ananafi o lo o faia le faafetai i Sui o Malo, Sui o Nuu, Pulenuu ma Sui Tamaitai o si o matou itumalo aemaise foi nisi o le itumalo sa faapena ona tofia i nisi o Komiti.

SUI FOFOGA FETALAI: Malie le sui usufono o lo o saunoa se i tulai mai le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): Lau Afioga i le Fofoga Fetalai, o le talosaga a le sui usufono o se talosaga e ogatasi foi ma le talosaga lea sa faafogafoga i ai le Maota, a le Afioga i le sui usufono ia Salausa, ona e aafia uma ai foi ma lea itu o le tatou taulaga. Ma o lea ua uma

foi ona faasilasila finagalo faaalua, o mataupu na o lea e lotea i le taimi lenei. O lona uiga e taua le tuualalo, a o lea foi e i totonu o le Maota lenei le Ofisa Sili o Matagaluega e fitoitonu lava i ai le mea lea, o se fesoasoani mo le taimi nei ina ia faatinoina loa. Ae taua le faafogafoga mai a le Ofisa Sili o Pulega, o lo o aumai malosia pea e outou o sui usufono le tulaga taua, aua e le faatali le tai fanae i le oso ae o le la, po o le a le... ona faatoa gau lea pe fanae mai le tai. E faapena aga a le tau, o se faiga vave e moomia, o le mea lea o lea ou te tulai atu e faataua, a o faafogafoga mai Ofisa Sili o Pulega o Matagaluega e fitoitonu i ai le mataupu lea, ia, o le mea ua tataua ona fai. A o tua atu o taumafaiga ia, ua leva ona ou faasilasilaina atu le poloketi tele lava, masalo tasi lea poloketi aupito maoae, o lea ua uma ona faataoto seleni e faatino ai, ua uma ona aumai le ioega a le Faletupe e faatino ai faapea foi ma le isi paaga, ona e \$100miliona Amerika e faatino ai, e tusa lena ma le \$260miliona tala Samoa.

O lea foi la e faafogafoga mai tatou kamupani eseese i totonu o le taulaga ma Samoa atoa i le taimi e faasalalau ai tenders. Ia matua tuu i le ooooga le faatinoina o tenders i le faatinoina o alavai nei, aua ne i faia ni togafiti e vaaimamao atu lava i o e faalaitiiti le isi mea ae faatele le isi mea. Ona o nei mea, tatou te iloa lelei lava o mea nei o faipinisi, e taumafai foi latou e maua sina a latou seleni. A o le tulaga taua i le Faigamalo lenei, aua ne i motusia mea o atinae. O le atinae lea a faatino e le tasi se tausaga e fai ai, masalo foi e le 2 pe 3 tausaga e faatino ai, ona o le tele o le atinae. Ia, lea lava na amata mai i le 4 tausaga talu ai le faatinoga o le vaega lea e aofia ai ma auala laupapa ia, le auala lea i Vaisigano ma le auala i Maluafou. E aofia ai foi ma le toe faafou atoa o le auala lea i Lelata ona e i ai faaletonu la ua i ai.

Lau Afioga i le Fofoga Fetalai, e le laitiiti la le mataupu lea ua laga nei e le sui usufono, e taua. Ou te faafetai o le mataala e faamanatu ma faamanatu mai pea, ua leai nisi o toe aisili, o Taitai nei o Samoa lea o lo o faaali o latou finagalo, a o lea e faafogafoga Ofisa Sili o Pulega, o limataumataua ia o le Malo, e faalogo i ai Taitai i le latou fautuaga, ina ia faatumau ai le mea leni lau Afioga i le Fofoga Fetalai i le sese o faaaliga ia e fai nei ua le toe aoga Ofisa Sili o Pulega o le Malo, ua pule tutasi e le Taitai o le Malo. O se manatu vaivai tele. Tuu ese mea o taaloga faapolokiki, tuu ese, e le o le taimi lenei e fai ai ni lafoga tuulafoai faapea aua o lea tatou te vaai vaai vaai i taimi uma i le tulaga taumafai o le Malo, e tapa ma aoao mai manogi ina ia faafaigofie ai a tatou galuega fai, e le gata o le faaaoga o tatou tama fanau o lo o i ai le tomai, ae faapena foi ona tatou faaoga tatauina seleni a paaga o lo o aumai. E le aumaia ina ia tufa, ae aumai ina ia fau lelei ai mea ia, mea ia, aua e vaai tino i ai tagata lau Afioga i le Fofoga Fetalai, ma faasaoina ai lo latou soifua, faasaoina ai a latou meatotino o fale ma auala.

Lau Afioga i le Fofoga Fetalai, o le faamalamalamaga lena, ma o lea ua oo i le taimi ua alu mea nei o tauofoga. O tauofoga foi, e le puupuu le taimi e faia ai, ona a fai, e matua filifili lava latou o lo o atoa i ai le tomai i vaega

uma lava tau inisia ina ia malosi le atinae. Tatou te tilotilo i ai i mea ia e tutupu i fafo, e le faataga faia. E oo foi i fafo, na ona pa mai lava o le vaiatafe malepe uma ma mea o faatanoa e fai, e le o se mea lena e faatopelau ai faaiuga nei e umi le taimi o faagasolo le tulaga o le vaavaai totoa i inisia ua talafeagai, ua i ai foi le poto masani.

Lau Afioga i le Fofoga Fetalai, o lou toe tulai atu lena e faalatele ma faamanino le mea lea o lo o augani mai ai le sui usufono, o mea e moomia i le taimi lenei, na o se tulaga e fesoasoani, ona o lea e sau pea le timu, e le uma le taimi o timuga. E taua tele ai le tuualalo.

SUI FOFOGA FETALAI: Ia, e manatu le sui usufono mai Vaimauga Sisifo o lena ua saunoa manino le Afioga i le Taitai o le Malo, ae faamalo i le sui usufono le mataala, o lea e matau atu i lau saunoaga, o lea a oo loa i aso o lologa lona uiga e te fealuai ma vaavaai i tulaga uma o lou itumalo. Ia, tasi la lea sui usufono lelei, o lea a e oo mai lava i lenei taimi o lea e faaauau lava ona tiute, aemaise la i i le Vaimauga. Malo, o lena ua tali lou finagalo, o la e ua faafofoga mai le itumalo, ae faaauau lau saunoaga.

Tofa LENATAI VICTOR FAAFOI TAMAPUA: Faamalo faafetai i lau Afioga i le Fofoga Fetalai. E sao lelei lava le saunoaga, o le sui usufono na fanau ma ola ae ai i totonu o le nuu aemaise le itumalo. Malo faafetai.

E talitonu o le a agai tonu loa se faamatalaga i le vaega sa gata ai si au taumafai i le aso ananafi. Lau Afioga i le Fofoga Fetalai, e fia molimoli atu le faamalo ma le faafetai i lenei itumalo i le tautua le faalogologotiga a Ofisa Sili o Pulega ma aufaigaluega a Matagaluega ma Faalapotopotoga Tumaoti a le tatou Malo. Faamalo le galulue, faamalo le tou finafinau i mea lelei aua Samoa ma lana Faigamalo.

E faafetai faapitoa i lau Afioga i le Failautusi ma lau Lagolago, faapea le Ofisa o le Fono Aoa.

Lau Afioga i le Fofoga Fetalai, e fia faai se faamatalaga i le nofo tatalo ma tapuai a si ou itumalo i lenei 5 tausaga, le itumalo pele o Vaimauga Sisifo Nu.1. Sa ou taumafai i le lelei aupito sili ona mafaia ou te tali atu ai i lau faaloalo maualuga, ae paga lea, afai ua le atoatoa sau tautua, tofa malilie ona ua pau o se mea ua oo i ai le malosi o la outou auauna. O lau tofa faatupu ma lau faautautaga faafaleupolu, lea ou te seei ai i le Palemene i le Paeaiga o le a maea i le tausaga nei. A o lau faaeaea, sa pale i lou ulu, o lou alofa sa fai ma ou sei ma ou pale fuiono i so o se auala sa faatino ai lau tautua faalelava mo oe le itumalo pele.

Lau Afioga i le Fofoga Fetalai, ona o le toe iloilo o tuaoi o itumalo, o lea ua i ai ni suiga laiti i le vaevaega o Vaimauga Sisifo i lenei Paeaiga o le a sosoo mai. Ae talitonu le taofi, o se suiga lelei mo tatou amaise le itumalo. Aisea? Ona o le a le toe toalua, ae o le a toatolu sui usufono o Vaimauga i Sisifo i totonu o upufai a Samoa. O lea e fia faaleo le agaga faafetai o nisi o

tuaa ua lagomau i tiasa i le latou vaaimamao, i latou ia sa nofoia le nofoa a lenei itumalo i le 40 tausaga talu ai, le Afioga ia Asi Sagagauatasi Faamatala, le Afioga ia Patu Afaese, le Afioga ia Patu Ativalu Togi II ma le Tofa ia Sililoto Tolo. O nisi ia o i latou sa faapena ona faaleo ma finau ina ia i ai se nofoa faaopoopo mo le itumalo, ona o le tele ma le toatele o tagata palota e faatusa lea i isi itumalo. Faamalo faafetai.

Faafetai i le Afioga i le Palemia ma le Minisita o Faiga Palota faapea le Kapeneta mo le faatinoina o lea talosaga ua tausaga i le matou vaitaimi. E talitonu a tulai mai le toa-3 o lo o i ai nei i le Itu i Sisifo i le Paeaiiga i le taimi nei, ma Tuisamau o lo o tulai mai foi i le la Itu i Sasae, o le a toa-4 sui usufono sinia a Vaimauga i totonu o le Maota o upufai a le Malo.

A o le a fagatonu ia le malama i le itumalo fou faapalota o Vaimauga Sisifo Nu.2...

SUI FOFOGA FETALAI: Malie le sui usufono se i tulai mai le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e tatau ona faamalamalama le mea lea, ina ne i te i ua faitauseseina le upu lea ua 3 sui usufono. O le reform tele lava lea na fai e le tatou Malo, ina ia taumafai ia faalaugatasia uma itumalo i le tulaga o le tasi le itumalo, tasi le sui usufono, tasi foi le tagata palota, tasi lana palota. O le faavae ato lava lea, po o le ki lea o lea e taoto i totonugalemu o teuteuga nei, ia aua ne i toe tulai mai se tulaga e atagia ai le le tutusa o itumalo, e fua i le aofaiga o tagata o lo o i ai i lea itumalo ma lea itumalo, lea na mafua ai ona tatou faia se faiga e pei o se fofu foi lele o se valigapou, e tau ina tape ai, a o la e i ai pea, e olaola pea le mata e le mafai ona tapenaina. Aisea? E leaga o faiga nei o faiga palota, e le o ni tatou faiga faaleaganuu. O faiga faaleaganuu e pulea mai totonu e alii ma faipule ona tofi mai ai lea, a o lea ua tatou alu i le filifiliga o sui usufono e ala i le palota. O lea foi la ua tatala ai ma le palota ua le na o matai, a ua i ai ma i latou e le o ni matai, 21 tausaga. O le tulaga la na fofu ai a o le i faia le suiga lea, o le tai-2 o sui usufono e ave i itumalo tetele tagata ma 2 ai ma palota a le tagata e toatasi. E tele lava ina tulai mai ai vesiga, ae faitioina pea i totonu o le Maota lenei lau Afioga i le Fofoga Fetalai, ona ua amata ona talanoa itumalo tetele nei, ua tatau foi la ona toe faaopoopo se isi 2 ona 4 fai ai lea o latou sui usufono, ona faapena foi lea ona 4 ai palota a le tagata e palota.

O le ala lena e loloto tele lau Afioga i le Fofoga Fetalai faavae ia na fai ai le teuteuga lea i le tatou Nofoaiga lenei, ina ia toe tilotilo i le uta fetalai po o le tofa fetalai, ae fetuunai i le tulaga o le toe tosi itumalo, ina ia taumafai ai ina ia maua se tulaga e faalaugatasia ai le isi itumalo i le isi itumalo, ina ia tumau ai pea le agaga maualuga lea, ina ia faatutusa ai, tasi le itumalo, tasi

le sui usufono, tasi le tagata palota, tasi foi ma lana palota e fai. O mea na e fai uma lava e atunuu o le lalolagi o lo o faafoe a latou filifiliga o latou taitai i le faiga faapalota. O lea la ua alu ai nei tatou, ma liliu ai loa ma le faalupega, ua le toe taua o se itumalo faaalaalafaga e atagia ai le itumalo faaleaganuu, ae ua tau o le itumalo faapalota.

O le ala foi lena e taua tele ai le lagaia o le manatu lenei o le sui usufono. Aisea? E leaga e lolofi mai pea tagata i totonu o le taulaga i se tulaga e matua le maalofia, galuega faapea foi ma aoga maualuluga. O lea la e le uma lava le lolofi mai nei ma e lua, lolofi mai pea ma lolofi mai pea i totonu o le taulaga ma ona fuuaai. E faapena foi le mea e tupu ia Salelologa, ona o lea foi ua tuputupu ae Salelologa, o le toaiga o le ulufale ma le ulufafo i totonu o le tatou motu tele i Salafai. E alu alu foi atinae Asau, ona faapena foi lea, o le ki atoa ma le tatala o le atinae i le itu atu le la i Sisifo o le ava ina ia faaloloto ia mafai ona sao mai ai i totonu mea o vaafagota ma vaa meli mo turisi e atiae ai le la itu o Salafai. O lona uiga, e i ai foi le taimi e faapena ai foi Asau latou, e tuputupu ae le fuainumera o tagata ona o galuega, ia ma faatino ai lava le faiga lea. E alu alu foi toe faaopoopo itumalo i le tulaga o tuaoi ma toe faatuaai le tatou atunuu i tatou itumalo ia tu taulaga, ona e tupu pea, tupu pea, tupu pea lau Afioga i le agai atu i le lumanai. Ae na o le pau lava lea o le ituaiga fofu e fofu ai, o le fofu o lo o fai foi e atunuu o lo o fai a latou faiga palota.

O le mea lena ou te faafetai ai i le Matagaluega o lo o nafa ma mea ia, i le Ofisa Sili o Pulega ma le Minisita, o le fetuutuunai o latou faiga faavae, ma o lea foi ou te faalogo e faamatala, faamatala, faamatala mai i Aso Lulu, Aso Lulu uma lava, faamalamalama i le tatou atunuu ina ia malamalama atili ai, e le tau omai i i le ofisa e mamao. O lea e alu atu le faamalamalamaga, ma o lau fautuaga lena e auala atu i le Maota lenei, tatou faalogologo i le anoano o mataupu o lea e aumai e le Komesina o Faiga Palota ma lana Matagaluega faapea foi ma le Minisita o lo o faauluulu ai, ina ia faamalamalama ina ia malamalama ai tagata e fia malamalama.

Lau Afioga i le Fofoga Fetalai, o lau toe tulai atu lena e faamanino le vaega lea.

SUI FOFOGA FETALAI: Faafetai mo le saunoaga i le Taitai o le Maota.

Susuga Hon Laauli Polataivao Leuatea (Gagaifomauga Nu.3): Lau Afioga i le Fofoga Fetalai, e fia maua se avanoa faamolemole.

SUI FOFOGA FETALAI: O lea e maua o lo o tulai mai le Afioga i le Minisita mo Galuega Tetele a le Malo. Se i tuu atu i ai le avanoa, saunoa.

Susuga Hon Papaliitele Niko Lee Hang (Minisita mo Galuega, Felauaiga ma Atinae Eseese): Faafetai mo le avanoa. Faafetai foi i le

Afioga i le Palemia mo le faamalamalamaina o le tulaga lea ua oo i ai le matou itumalo. Na o se mea lea e fia faamalamalama ma faasao, ona ua saunoa le sui usufono i le Vaimauga Sisifo Nu.1. Ua sui atoa lava le mea lea, e le o toe taua ni Sisifo ma ni Sasae. O le tulaga lea ua i ai, o le Vaimauga Itumalo 1, Vaimauga Itumalo 2, Vaimauga Itumalo 3 ma le Vaimauga Itumalo 4. Ne i mea ane ua confuse le au palota i le folasaga a le Afioga i le sui usufono. Ua le o toe Vaimauga i Sisifo matou, o la ua alu atoa Vaimauga Sisifo ma le Vaimauga Sasae. Ae o la ua faanumera, o le 1 la o o i sasae, faasolo mai lea o le 2, 3, 4 i i Sisifo. Ae le o toe taua la o sisifo ma sasae, ne i mea ane ua confuse le afioaga ona o le tulaga lea. E leaga o lea foi ua toe tau ia Vaimauga i Sisifo ua Nu 1, ae ua le toe i ai se Vaimauga i Sisifo. O le afioaga po o le itumalo o le sui usufono lea na saunoa o Vaimauga Nu 2, ae Nu 3 au, ae Nu 4 le Afioga i le Minisita o Faamasinoga mo le faapupulaina o le mataupu lea. Ma le faaaloalo lava.

Susuga Hon Laauli Polataivao Leuatea: Lau Afioga i le Fofoga Fetalai...

SUI FOFOGA FETALAI: Se i alaala mai lava i lalo le sui usufono se i fai atu le faamatalaga a le Fofoga Fetalai.

SUI FOFOGA FETALAI: E lelei ona ou toe faamanino i sui usufono na saunoa i le tulaga o faigapalota. O le agaga lea o tatou Tulafono e tatau ona manino ma malamalama. O le tatou Tulafono o le Vaevaeina o Itumalo Palota 2019, e faatoa faamamalu ina ua faataape e Le Ao o le Malo le Palemene i le tausaga lenei. O lona uiga o lea lava tatou te taoto lava i itumalo tuai, e faatoa faamamaluina. O le mea lea e tatau ona manino i le tulaga e pei ona i ai saunoaga seivagana ua maea ona faataape e Le Ao mamalu o le Malo. O lea lava ou te uuina pepa ia ua pasia i totonu o le Maota lenei, e faatoa faamamalu pe a faataape le Palemene lenei, le tulaga o le Vaevaeina o itumalo fou. Ae peitai o lea ua saunoa le Taitai o le Maota, ua faamanino tulaga uma ma faavae o le faamoemoe. O le mea lea ou te manatu ai, e tapa sui mamalu faasee ese ae agai sao mai e faafetai i le itumalo i la latou tapuaiga, o le agaga lea.

A o lea e matau atu o lea e tulai mai le sui usufono mo Gagaemauga Nu 3, po o le a le mafuaaga, o lea e talanoa itumalo faale-Vaimauga.

Susuga Hon Laauli Polataivao Leuatea: Faafetai mo le avanoa, e leai se agaga e faalavelave i le saunoaga matagofie. E agai tonu lava i le sui lau faamalamalama, ou te le o agai i nisi o faauilavea. E faafetai tele lava Lenatai mo lau saunoaga malamalama o lea ua manino le mata o le vai i lenei taeao.

SUI FOFOGA FETALAI: E lelei ona ou faamanatu atu i le sui usufono mo Gagaifomauga. Se i fai atu le tala a le Nofoa, alala mai i lalo, faafetai.

E lelei ona faamanino ma address lelei le Nofoa, po o le a le uiga o le fia faamalamalama lea. O tatou Tulafono Tumau, e ao ona faamanino lelei, o le faatagaga foi, e ao ona manino le Nofoa. O le mea la lea, address muamua le Nofoa, i le agaga o le mea e fia faamalamalama ona faataga lea. Se i tulai mai le sui mamalu.

Susuga Hon Laauli Polataivao Leuatea: E tu matila lava lau pule lau Afioga i le Fofoga Fetalai. E leai foi nisi o faiga fou ou te manatu e tataua ona ou toia ai le va i lau faatonuga, e leai o lona lava e taoto lava i le agatonu. O lalo o le tatou Tulafono Tumau, e avanoa le sui i so o se taimi e tulai e faamalamalama se mea i le saunoaga a le sui. O lea la ou te agai sao lava i le sui i lana saunoaga lea e 4 sui o Vaimauga. O lea ou te agai e faamalamalama o le mea tonu foi lea sa atugalu i ai lou taofi. O lea ua manino, faafetai Lenatai, o lea ua faafofoga le atunuu, o lea e faaopoopo sui o Vaimauga ae aveese le sui e tasi o Savaii. Na matou o mai o 20 sui a o lea ua aveese, o lea ua aveese.

SUI FOFOGA FETALAI: Tuu atu le avanoa i le Taitai o le Malo. O le tulaga e fia faasao o le saunoaga.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: O le mea e fia faasao, o lea sa ou tulai atu e faamatala atoa le agaga loloto, loloto loloto lava, e le o se agaga papau na faia ai. Sa faia foi le mea lea o i totonu le sui lea i totonu o le Kapeneta sa faatalanoa ai. Sa ou manatu la e malamalama lelei ia le sui usufono mo Gagaifomauga Nu 3, aua na te le i teena le mataupu leni. E leaga o le mataupu na amata mai loa le Nofoaiga tagofia loa.

Susuga Hon Laauli Polataivao Leuatea: Lau Afioga i le Fofoga Fetalai, malie lou finagalo, ia ua e vaai i ai i le mea lea e sasa mai. O le ala lea, o lea e sao tonu au, e te faatagaina le isi faauilavea i le isi faauilavea.

SUI FOFOGA FETALAI: Malie le sui usufono, e le o se faauilavea o le faamaninoga a le Malo i le tulaga o le aumaiga o le mataupu lea. O lea ua faataga e le Nofoa, alala mai i lalo. Ia saunoa le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: O le tulaga lona o lea sa ou taumafai e tulai atu ai, ua uma ona fai e matou sa i ai i le Kapeneta i le taimi lona, ma le agaga atoa na faavae ai suiga ia. E leai lava ma se leo na faasala ese, ma le agaga manino ma le mama lea sa ou avatua. O lea foi e

faamanino, o lea e faaigoa o le Nu 1, Nu 2, Nu 3 ma le Nu 4. O le tulaga foi i le mataupu lea ua aumai faafia aumai faafia aumai faafia, e faaoloataua ai Savaii ua aveese le Nofoa e 1. E faapefea ona aveese, o la lava e i ai Nofoa o Savaii latou, faaopoopo i ai ma le Nofoa lea o Leauvaa. E tusa lava pe tau o le Nofoa i Upolu, a o Leauvaa lava ia ma matai uma lava e i ai o matai Savaii. Seivagana le pepe faatoa 2 tausaga na te le malamalama i tala tuu i le mea na ala ai ona o mai i latou alii ma tapaau o le itumalo, e faapea foi ma Salemuliaga. Na o mai ona o le faalavelave na tupu, ae le mafai ona aveese le ta'u o i latou e o mai Salafai. Lau Afioga seivagana le tamaititi faatoa fanau, e le malamalama i le mea lea. Ae seivagana foi le tamaititi faatoa fanau, na te le iloa le mea o le taufaasese lea e fai nei, e faalumalumaina ai se faiga ua leva ona taumafai i ai le Palemene lenei talu mai lana Nofoaiga muamua.

E mai lava i le Nofoaiga muamua, o tau fofo le mataupu lea, e malamalama lelei ai au, ma matua o latou ia e tutulai mai nei, sa o matou faitonu faatasi i se fofo e fofo ai. Ou te le faitio lava pe a tulai mai i latou o fanau po o alo e faasino i sui usufono sa o matou faitonu faatasi i se ituaiga fofo e fofo ai le mataupu lea. O lea ua maua le fofo, e le mafai la ona malamalama i ai fanau faatoa fanau nei ananafi.

Susuga Hon Laauli Polataivao Leuatea: Tulai atu lava ma le ava ma le faaaloalo... malie lou finagalo

SUI FOFOGA FETALAI: E lelei ona fai atu le tala a le Nofoa i le vaega tonu lea ua oo i ai le tatou mataupu. Malie le sui usufono alaala mai lalo

Susuga Hon Laauli Polataivao Leuatea: Ia malie lou finagalo e aumai so matou avanoa.

SUI FOFOGA FETALAI: O le Tulafono Tumau ia tausisi...

Susuga Hon Laauli Polataivao Leuatea: E tuga upu ia e fai mai faamolemole. O la e faafogafoga le atunuu. Nafaitoa matou te malu i lau afioga le Fofoga Fetalai, aumai so matou avanoa faamolemole.

SUI FOFOGA FETALAI: E lelei ona ou faamanino atu le mea lea, o le tatou Tulafono Tumau 78(8). E le mafai e se sui usufono ona toe fesiligia se mataupu ua uma ona pasia i le Maota lenei, ma ua uma ona ave i ai le ioega a le Palemene. O lea ua e toe fesiligia tulaga ia, o le saunoaga a le sui mamalu o Vaimauga Sisifo, o le ave o le faafetai. O le agaga o le tatou Fonotaga lenei, o lea o le a toso, a o le Tala o le Tupe e faapea e momoli le faafetai ma le faamalo i itumalo taitasi, ona le latou puleto, e pau lea.

Ae ua toe taua Tulafono ua maea ona pasia e le Maota lea, e faamalulu atu i le sui usufono. E le mafai ona toe fesiligia e se sui usufono Tulafono ua maea ona pasia e le Maota lenei. O le mea la lea, i lalo lava o le Mataupu 78, ua ou faamutaina ai ia le avanoa.

Susuga Hon Laauli Polataivao Leuatea: Ioe, malie lava lau Afioga le Sui Fofoga Fetalai.

SUI FOFOGA FETALAI: Ou te tapa le sui usufono mo Vaimauga Sisifo.

Susuga Hon Laauli Polataivao Leuatea: Malie lau Afioga, o lenei lava ta te tuituimalofie atu. Afai la o le tulaga lea, Samoa faamasino outou, o lea ua ou taumafai atu e le i... o lea ua oo foi i lau aiatatau o mea e fia faamalamalama o lea foi ua aveese. E faafefea ona fai nei mea lau Afioga i le Fofoga Fetalai,

SUI FOFOGA FETALAI: Malie lau Afioga le sui usufono mo Gagaifomauga Nu 3.

Susuga Hon Laauli Polataivao Leuatea: Malie lau Afioga o lea foi ou te talosaga atu. O le a fai lou finagalo, Samoa faamasino outou, faamasino outou.

SUI FOFOGA FETALAI: E le o aveesea e le Nofoa... alaala mai lalo faamolemole. E leai se agaga e taofia e le Nofoa le aiatatau a le sui usufono, ae peitai o tatou Tulafono Tumau o le Maota lenei, o lea e tausisi i ai le Nofoa. O le tiute o le Nofoa ia faatoa filemu ma sologa manuia tulaga o taualumaga o le Fono Aoao Faitulafono a Samoa. E le o le alu i luma ma toe foi i tua, e le o le agaga lena. O le agaga o le tatou Tulafono Tumau ia see lo tatou vaa, e le o le aveesea o se aiatatau. O lea foi e te tapatapa Samoa, o lena lava e te faafofoga mai, e taofi lava le Nofoa i tulaga o le Tulafono Tumau.

Susuga Hon Laauli Polataivao Leuatea: Lau Afioga ua uma sou lagona. Lau Afioga i le Fofoga Fetalai, e faamalulu atu. Nafaitoa e faamalulu atu, o le a uma so matou lagona, e pau lava lea o le mea na matou apaapa atu ai, e faamanino. Le mau Tulafono Tumau ua toe soli lava e tatou.

SUI FOFOGA FETALAI: Faafetai i le sui usufono i le faautagia, ia o se vaivaiga o le Nofoa. A o tulaga o Tulafono Tumau, o le agaga lena, malie le sui. Ou te tapa le sui usufono o Vaimauga i Sisifo.

Susuga Hon Papaliitele Niko Lee Hang: Lau Afioga i le Fofoga Fetalai, se avanoa faamolemole.

SUI FOFOGA FETALAI: Ia se i saunoa le Afioga i le Minisita o Galuega, Felauaiga ma Atinae Eseese.

Susuga Hon Papaliitele Niko Lee Hang: Faafetai i lau Afioga. E tasi lava si mataupu lea ua ou tulai ai, i le tulaga lea faapea ua tuuaia lo matou itumalo faapea ua fai mea faapito le Tulafono. O le suiga e le o se Nofoa faaopoopo, e manatua o le Nofoa lea ou te tulai mai ai i le Palemene i le taimi lenei, o le Nofoa Tu Taulaga i Sasae, o le isi vaega o le Vaimauga. Aua o le aupalota e amata mai i Mulinuu seia tau i Laulii. O lea la e aofia uma le Vaimauga, a o le faamatalaga lea e faapea ua faaopoopo se Nofoa, e leai o lea ua aumai matou i i. O se faamalamalamaga lea lau Afioga.

SUI FOFOGA FETALAI: E faafetai o lea ua maua e le Nofoa lau Afioga i le Minisita. Ua uma ona fai le faaiuga a le Nofoa, o le a faasee ese ae faaauau le saunoaga. Ua maea lou taimi Vaimauga i Sisifo.

Tofa LENATAI VICTOR FAAFOI TAMAPUA: Ua faamalo faafetai i lau Afioga i le Fofoga Fetalai. Le itumalo faale-palota Vaimauga Nu 2, o le upu a le Tusi, ou te le tata tuli pe ou te fafagu i lau pele, ae o lau upu ou te tatalo atu ai nei, e pele i lou loto oe Vaimauga Nu 2. Aua o le itumalo na ou fanau ma ou ola ae ai seia oo mai i le aso. Ou te le talaleu i ou paia ma ou mamalu ma ou tulaga faalupea, o lea ou te faatagisia ai ma le loto maualalo lau puleto ma lau faatofa faale-Atua. O le a mafai ai ona ou faaauau lau tautua ia te oe lou itumalo e ala i lou Nofoa o le Palemene. O lau tama fanau e tautua mo oe ma le faamaoni, loto maualalo ma le alofa. Ia manuia tele lau faiga filifiliga. Faafetai i lau Afioga i le Fofoga Fetalai, mo le avanoa, ia faamanuia mai le Atua i taulumaga o totoe o lenei Paeaiga. Soifua.

SUI FOFOGA FETALAI: Ua faamalo saunoa i le sui mamalu, o lea ua fofoga lou itumalo, le tapuaiga foi a Samoa, ia malo tau, malo le onosai. O lea ua molimoli lava lau faafetai ua tau lava i taū. O la ua faafogafoga mai, aua le agai i luma i le faiga filifiliga a le atunuu o lo o loma nei.

O le avanoa lenei mo se isi sui usufono e fia saunoa. O lea e matau atu ua mumu mai le moli a le sui usufono mo Vaimauga i Sasae. O lou avanoa lelei lenei.

Afioga SULAMANAIA FETAIAI TAUILILI TUIVASA (Vaimauga Sasae): Lau Afioga i le Fofoga Fetalai a tapisa le taeao lenei ua sala ina tapisa, leaga o sasa ia leaga o lea o le a lauga le Tuisamau po o le Saleupolu. Lau Afioga i le Fofoga Fetalai, e leai se manatu o le taeao lenei ou te lauga

ai, mafua i se a? Leaga o ou eleele sa nei o lea ou te tausia ma ou tausia. Ae leaga o lea ua amata mea le uso laititi lea, a o lea e nofonofo le tama matua. Silafia foi le Vaimauga, o lea e i ai isi sui usufono e toa-lua lea e i le Kapeneta, e le mafai ona sausaunoa. Sa manatu lava e tomuli ia i maua, ae ia mea lea e lelei ai itumalo e fealofani, leaga o le ma faalupega, o aiga e lua ma le nofo a tula, o le aiga, sa le i sauni i le taeao lenei, ae pei o le tootoo o Tuisamau e soo se taimi lava e ta ai. E ui lava ina ou vaai atu e le o i ai le toe ulutaia o le Palemene, ae faafetai i faamanuiaga a le Atua ua tofofi ai oe, e te taitaia le Fono Usu a le atunuu. Amuia oe, amuia le manava na e fanau ai, lalo luga lalo luga, o faamanuiaga na a le Atua, faafetai.

Lau Afioga i le Fofoga Fetalai, ae le i faia se sao o lenei itumalo, e muamua ona faatalofa ma ofo alofa atu, faamanuia atu le tausaga fou i lena itu o le Maota. Afio lau Afioga i le Taitai o le atunuu, lau Afioga foi o le Palemia, po o lau Afioga foi o le Taitai o le Maota, lau Afioga Tuilaepa Dr. Sailele Malielegaoi ma le Kapeneta, aua Afioga i Alii ma Tamaitai Minisita. E faatalofa atu foi i le afifio o Afioga i Minisita Lagolago. E faatalofa atu foi i lau Afioga i le Fofoga Fetalai, lau Afioga Leaupepe Toleafoa Pulemagafa Faafisi, faapea lau Afioga i le Fofoga Fetalai ua taitaia le Maota i lenei taeao. Liliu mai i lenei itu e muamua ona faatalofa atu Afioga i Alii ma Tamaitai faipule. O e na tofofi mai e le atunuu e o mai e faia tonu o Samoa. Ua faamalo le galulue ua faamalo le faatautaia o le sa o Samoa, o lea e see lava e oo mai i lenei itula o le taeao.

E le mafai ona alu le lauga a lenei itumalo e le i faatalofa i le tapuaiga a Le Ao mamalu o le Malo ma le masiofo, le Afioga i le Tuiaana aemaise le masiofo, le Afioga i le Mapusua o le alo o Leniu. E faapena foi ona faatalofa atu i le tapuaiga a le sui o le Fono o Sui Tofia, lau Afioga Le Mamea Ropati ma le masiofo. Ae a le tapuaiga a le Faamasino Sili aemaise le Vasega o le Faamasinoga, Alii ma Tamaitai o le Faamasino o Soligatulafono. E faatalofa atu foi ma ofo alofa atu lenei itumalo i le tapuaiga aua le faauluuluga o le Faamasinoga o Fanua ma Suafa, lau Afioga i le Peresetene, le Afioga ia Fepuleai Ropati Atila. Ua famalo le tautua i lena ituvai o le tatou Malo. E le mafai foi ona galo le tapuaiga lilo le afaigaluega Paia a le Atua i so o se Fatafaitaulaga, e le gata i Samoa nei, a o atunuu mamalo ma so o se tafa o le lalolagi. O ana tama fanau o lo o tapuaia faiva o si o tatou atunuu. Na tulivae, anapopogi ma tatalo aua se manuia o Taitai ia. Ae a Samoa ma lana tapuaiga.

Ona taliu mai ai lea i le tapuaiga a si ou itumalo o Vaimauga Sasae. E mai lava i Fusi ma Fanuatanu o Lalotea o le malae o le faautugatagi a Tumua, Niniva ma Punialavaa, Faletolo, Pilioua ma Falepouiva ia tapuai maia. O le a fai le lauga, o le a fai le lauga a lo tatou itumalo. O Lufilufi, Leulumoega aemaise o lau Afioga i le Fofoga Fetalai, ia tapuai maia aemaise lenei Maota.

O le a fai le lauga, “Papa, Papa, tatala mai, se i ulufale atu Tiitiatalaga, Papa, Papa, tatala mai, se i afio atu Tiitiatalaga, Papa, Papa, se Papa, tatala mai, ua fia oo atu Tiitiatalaga.” O le alaga a le tagata fiaola, o le alaga a le

tagata e fia maua manuia. O le alaga a le tagata e fia maua faamanuiaga, o le toa lenei o Samoa po o le toa o le Vaimauga o Titiatalaga. A maea se faatamasoaliiiga sa feagai ma ia, e foi lava i lona matua, o le papa. E foi lava i lona faasinomaga o le papa, e mafua i se a? Le tapuaiga ua iu manuia. Sa taputapuui o lea ua ae ma le manuia, e toe foi lava la i le mea na sau ai, o lona malosiaga lea. E le gata ina momoli laau i Fogaa ma faafoi lapalapa o malo ua iu manuia se taua sa feagai ma le tama, ae toe aumai foi nisi faamanuiaga i isi foi taua ia o le a feagai ma ia. E faamanuia mai e ala i le faauuga, e faapena lagona o lenei itumalo i le taeao lenei. Lou itumalo ua ou foi atu, ua ou foi atu...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai...

Afioga SULAMANAIA FETAIAI TAUILILI TUIVASA: Oo... o...

SUI FOFOGA FETALAI: Malie le sui usufono mamalu Tiitiatalaga. Ia tuu atu le avanoa i lau Afioga mo se mea e fia faamalamalama.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Se o lau fesili, ou te fia malamalama po o fea lea e tu ai le papa. E leaga e i ai le vaega foi lea e igoa o faafafine, e fetau loa ma le latou faatama, valaau loa i le ituaiga leo lava lea, papa, papa.

SUI FOFOGA FETALAI: E masalo po o le Papaigalagala. Ae lelei ona faamanino mai leaga e tala lasi ma e oa le gagana e faauigaina ai le upu o le papa. E tapa le sui mamalu e faaauau le saunoaga matagofie.

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai, e pei lava ona ou fai atu, o le lauga a Vaimauga e le seua lava. E leaga ou te ava tele, a fuafua foi i le Afioga i le Palemia o lou uso faale-tulafono.

Ae o le papa lea e fesili ai le Afioga i le Palemia po o fea o tu ai, o le papa o lo o tu i Vailele ma Letogo. O le tama fanau lava a le nuu lenei o Letogo ma Vailele, o le ala lea. Ae ese ai le papa lea e ole ai le tama lea o Leala, e ole i le Palemia, papa, e ese la le papa lea e fai ai tama lea o Leala i le palemia...

Ae paga lava lea e ta liu ae popoe, e pei o le tala na fai i le sa o le Tuifiti, fai mai na sii e Vaea ae tuu i le mauga. Ne i sopoutu pe sopolagi so matou leo, aua le mafuaalii i le paia ma le mamalu o le Fono Usu a le Palemene o Samoa. O le ala lea ou te fisaga ai matagi le moe, ae ou maniti lava tino i le

matautu o le solo. Ae ou tu ai nei i fao ma ou laa i malaka ma ou faaete fimalie ma ou seu malu lupe o le taeao ma le aso. Tulouna ia tulouna le Maota Fono o Samoa i Tiafau nei. E fai mai a faatata i Palalaua talele i Fusi ma Fanuatanu, a faatata i Fusi ma Fanuatanu ona talele lea i Lalotea o le malae o le faautugatagi a Tumua. A faatata foi i Lalotea o le malae o le faautugatagi a Tumua ae talele i Niniva ma Punialavaa. A faatata i Niniva ma Punialavaa ae talele i Fatutolo ma Pilioua ma Falepouiva. O malae ia taotooto o lou itumalo o lo o ou sapi ai nei, i le Nofoa o le Vaimauga i le taeao lenei.

Ae ao foi ona ou faatulou aua le mamalu ma le paia o le Faletuamasaga. E leaga o le leo ua alaga o Tuisamau po o Saleupolu. A faatata i Faatoiaalemanu ma Laloniue ma Tapuotaota ae talele i Sinave ma Ulumootootua. A faatata i Sinave ma Ulumootootua ae talele i Vaiala. A faatata i Vaiala e talele i Lepea ma Vaitagutu. A faatata i Lepea ma Vaitagutu ona talele lea i Fogaa. A faatata foi i Fogaa e talele i Lotosoa. A faatata i Lotosoa ae talele i Niuvai ma Mataale. A faatata foi i Niuvai ma Mataale, o lea ua lou mai i le Laumua o Tumua i Vaopipi i Vaitoelau ma Malie. O paia ia ma mamalu o le Faletuamasaga, o lea ua ao ma sunui mai i Tiafau nei, o le malae o le faautugatagi, e saili ai le tofa aua se manuia o Samoa ma ona tagata.

O lenei taeao, a o le i oo foi le lauga i paia o Samoa ona faitauina lea. Ia taalolo ia sa ma faiga o Samoa o le aomamala. E mai lava i le faoseuga o ao ma le atufolasa, lonomua faletoto ma papa tuloto o Samoa o le atunuu tofi, e le o se atunuu taliola. E amata mai i le tai samasama o le Tuimanua, fai mai, na alofisa ai Malietoa ma le Tuimanua ma tulituli mai ai seia paia Fili ma Puletuu, na to ai manu o Malo. Na afua siisii ai tama ia, aiga ma o latou tama o tama ma o latou aiga. O aiga o tupu o aiga o nofo, aiga o ee, aiga o papa, aiga o Taifaifa, e tausii e le usoga a Tumua ma Pule, taoto. Tulouna Sua ma le Vaifanua, Fofu ma Itulagi o Saole ma Saleaamua ma le Launiu na saelua, Tama o Manuatele ma tootoo o le Faleula. O paia ia o le la itu o le Faleagafulu, taalolo.

A o lenei itula e fai se matou faamatalaga, faafetai i le Malo, faafetai i la outou faaeaea na tofofi ai le auauna faatauvaa. O le taimi na momoli mai au e nai ou tama i lenei Vaega Faaupufai, ou te manatua lava nai ou tama ia Tuliaupupu ma Mautaua Sione. O le a le tala na aumai i le taimi na momoli mai ai i totonu o lenei Vaega Faaupufai, e aumai le tama lea e asu se ipuvai. Aumai le atalii lea e aiaiuli, o lou lea agaga faafetai, e manatua nai tama ua fai i lagi le folauga.

Lau Afioga i le Palemia, faafetai i le sao o le taimi na tofi ai e le Atua le auauna faatauvaa e oo mai. E faafetai foi i le sao o le mea na tuu i ai, e tautua. E faafetai ai i lenei itula i le Afioga ia Gatoloai, o le tuputausi a Safotulafai sa ou galue ai. Sa auina mai au o se Komiti tofofi a le Malo, e 11 lelei ia Komiti nei sa vaevaeina. O le Komiti foi o le Va Fealoai o Matagaluega

tetele ia a le Malo, e ala i le taitaina a lenei foi tupu o le atunuu lenei, o le toe ulutaia, o lea e solisoli muliaao lava i mea na fai e si ona tuua. O nei Matagaluega a le Malo o lo o aofia ai i totonu le Matagaluega o Aoga Taaloga ma Aganuu, Matagaluega o Soifua Maloloina, Matagaluega o Tina ma Tamaitai, Matagaluega o Leoleo ma Falepuipui, e 11 lelei Matagaluega.

Ou te faafetai i le Atua i le tofiaina o au e le Palemia e tuu ai i totonu o le Komiti lenei, leaga sa ou galue i le Matagaluega a le Malo. E sau la e malamalama lelei, sa fai ai le sao. E faafetai i le faamuamua a le Malo o lo o tuu pea i le tulaga i aoaoga. A atamamai se atunuu ma ana tama fanau, o se atunuu manuia lea. A soifua maloloina foi ma maloloina ona tagata, o se atunuu manuia foi lea. O lea e i ai i totonu o le Komiti lea sa ou i ai, e ala i le taitaiga a le Afioga ia Gatoloaifaana, le alo o Tofilau, o le agaga faafetai lea. E faafetai foi i Ofisa Sili o Pulega o Matagaluega a le Malo sa o matou galulue i lea Komiti. Ona e a? o i lea e femolimauai ai ma siaki ai e lenei Komiti galuega fai a le Malo po o lelei ona faafoe ma ave foi i ai le tuualalo. O lou agaga faafetai i Ofisa sili o Pulega o nei foi Matagaluega e 11 na o matou galulue ai, o Matagaluega nei a le Soifua Maloloina ma i latou uma nei e pei ona taua.

O lou agaga faafetai foi i le isi Komiti na ave i ai au e le Taitai o le atunuu, le Komiti lea e Taitaifono ai le Afioga ia Tuitama, aemaise foi le Minisita ia Tialavea. Ia ma filo ai lava lenei auauana, faafetai i le faaaogaina o le faatauva. E faafetai i le amanaia o le sao sa tuuina atu i totonu, viia le Atua. O le isi agaga faafetai o lenei sui usufono, o le tuuina i le Komiti Faapitoa lea e i ai nei sa i ai. I le iloiloina ma le vaaia o le Tulafono lea o Fanua ma Suafa. O lou agaga faafetai lava lea, e ese lava le valaauina o le tagata na aumai e le Atua. Ou nofo, o ai au, o ai lou faatauva ua amanaia ai. Ina ua ou oo mai i totonu o le Palemene ma ou vaai i faamaumauga a le Fono Faavae, o la e i ai nai ou tama, o la e i ai nai ou tama i le Fono Faavae. O le ala lea e tagi ai le loto ma le mafaufau, sa le i mafai e nai ou tuua, nai tama o si ou itumalo sa i ai i le Fono Faavae ona tuu i totonu le tulaga lea i le Pulega a Alii ma Faipule po o le pule toatele, aulotu. O lo o i ai le Afioga ia Leniu Fanene o si ou nuu o Lauili, o le faatumutumuga lea o si o matou nuu. O lo o i ai si ou tama ia Tuliaupupu Muliaga Simaika o si ou nuu o Letogo. O lo o i ai si ou uncle o Ulumalau Tea Papalii aemaise Faaolosau Ausage. E faafetai i le Atua i le mamao o le tofa na i ai tama ia o si ou atunuu aemaise o si ou itumalo. E le i mafai ona tuu i totonu, mafua i se a? e na o le aia toatasi lava, o mai lava papalalagi faapena ona tutoatasi, ae o lou agaga faafetai ua tali le Atua. O le tala o lo o i ai i totonu sa ou faitau atu i le Fono Faavae, se i tulai mai ana tama fanau popoto ma le atamamai i totonu o le Palemene lenei. A le taimi lenei, o le taimi lenei o lea ua tali ai mea sa valoia e o tatou tama ma o tatou tina, viia le Atua.

Lau Afioga i le Palemia ma le mea sa tuu i ai lenei sui usufono, o upu a le atunuu, e le mafai e le tufanua ona fai le tautua. Aua na o le tomumu lava,

se na o le tupu lava. O le teuteuga foi o le Faavae e toatele nisi e pisapisao ma fai mai ua teuteu le Faavae. A lea ua ta i ai, e leai e 24 ia teuteuga o le Faavae. O le a le mea e ala ai ona teuteu, ina ia o gatasi ma le tulaga lea ua oo i ai le tatou foi Faigamalo i le taimi nei. O le isi teuteuga ou te faafetai ai i le Atua, ae ou te le i oo mai i le Palemene ae... o le mea lea e fai mai o tatou e faavae i le Atua. Ae ou te sau, sole e faavalea lava tatou i lena taimi, e le mafai sa i fafo o le Faavae. Ae a le taimi lenei i le Paeaiga Lona XVI, o lou agaga faafetai ua tusi ai Sulamanaia i totonu o le Palemene lenei o le sui o le Vaimauga, ina ua toe mafai ona tuu i totonu. Aua ana tupu mai ni mea i le faamasinoga, ou te masalo o le taimi lea na tuu i ai i totonu le Faavae o Samoa o le atunuu kerisiano e faavae i le Atua le Tama, Iesu Keriso Lona Alo ma Oe Agaga Paia, masalo e le iloa po o fea na oo i ai le lelea a Satani. E mafua i se a? Leaga e le i ai i totonu, a o lea ua declare i le lalolagi, o Samoa o le atunuu kerisiano. O lou agaga faafetai lea i lenei Paeaiga. O le Paeaiga na tofofi e le Atua, na tofofi i le finagalo o le atunuu. O plan ia a le Atua, e leai se Itu Agai. O le tele o taimi e talanoa mai isi tama, “Sole, o le a ea le vaega lena e te i ai? E vaai atu lava e...” Ou fai atu, “O tatou lava lena, e le i sau le sui usufono e nofonofo. A i ai lava ni mea e faaletonu, e manaomia le fautua, leaga na aumai lava e fai se sao, e aiaiuili ina ia see lava le sa o Samoa.” E momoli le agaga faafetai i lau Afioga i le Taitai.

O le isi vaega matautia le matagofie i lou oo mai i lenei Paeaiga, e 122 Tulafono Teuteu, Tulafono ua faatino ai lenei Paeaiga, 122, ae ese ai le 5 lea ou te le iloa pe aulia atu e tatou lenei Fonousu, e 122. O lou agaga faafetai lea, fai Tulafono aua se manuia lautele o le atunuu. E le na o se vaega ae fai mo le atunuu lautele. O le mea lena na tofofi ai tatou, tatou te omai e faia tonu, faia Tulafono aua se manuia lautele. E le fai faapito. O le ala lea o lou agaga faafetai.

A o lenei itula lau Afioga i le Palemia ma lau Kapeneta, ia, e pei lava o le upu foi lele, na tatou omai le lavalava, tatou te toe foi lava ma le leai o se mea. E faapena le tulai a le sui usufono lenei, na tatou omai e leai ma se mea, o lea o le a tatou toe foi lava i lota pausisi, i le mea na tofofi ai taita ma lota valaauina. Ona tu lea ma vaai, sa fai sau... sa togi sau maa? E le o galuega e fai i le itumalo, o le mea lena a le Malo ia e fai auala. E te tulai lava oe ma e tatalo i le Atua aua se manuia lautele e le gata o lou itumalo, a o isi foi. O lea e momoli le agaga faafetai i lenei Faigamalo ua oo mai, faafetai lava. O lea e vaai mai lava... Faafetai i si ou itumalo o lea lava e maua le malosi ona o la outou tatalo ma la outou tapuaiga.

O le tulaga i Minisita, na ona toe faamanatu lava, e le mafai ona taua le tele o galuega lelei ua fai i totonu o lenei itumalo, ne i faoa se viiga o le Atua. Pau o le agaga, faafetai i mea ua faatino, faafetai i a outou Afioga i mea ua faatino, faafetai foi i mea e le i faatinoina. Ua ta vaai i le utiuti o le faasoaso. Faafetai lava i lau Afioga i le Minisita mo auala ma... faafetai. Se na o le toe tatalo lava e pei ona faaluaina foi le finagalo. E pei o le itumalo lenei o

le itumalo e tele le suavai, e tamaoaiga i vaitafe ma mea faapena. O lea la ua pa nei le vai, ia na o si toe tanutanu lava e faaauau atu ai le tatou Tala o le Tupe mo le isi Paeaiga fou o loma nei.

Lau Afioga i le Minisita o Tupe, e tatalo atu, fai mai le talosaga, e le gata o pulenuu o si ou itumalo, se i silasila ane i o latou totogi. O pulenuu o lo o tua i ai si o tatou atunuu, aemaise le taimi lenei o le Koviti-19. E le gata o pulenuu tama, o nai tina, ua faateteleina le tele o auaunaga e faia i totonu o afioaga. O lea ua faamalosi atu le Komiti Tumama i totonu, e le malolo. O isi taimi e faitai nai tama e ona toalua ia e o i Komiti e valaauina i mea o pulenuu tina. E le lava se taimi. Ona e a? E aso atoa le tina i totonu o le faiga o mea le nuu, a o le tama foi, e le o lava. Se i fai se ponesi e faatalitali atu ai se siitaga, po o se mea foi e tau ai le agalelei. Aua po o le a foi le puipuiga o le faamai e le Matagaluega o le Soifua Maloloina, ae le mafai lava pe a na le malu pulega a alii ma faipule. O i, o le malosiaga lena o le Palemene leni ma le Maota leni, o pulega a alii ma faipule. E iloagofie lava itumalo o lo o mamalu pulega a alii ma faipule, e leai lava se mea o gase, e tau le o atu fua leoleo, e faatino lava e le pulega a alii ma faipule. O lou agaga faafetai lea i le Kapeneta ma mea ua faatino i lenei itumalo. Malo le galulue.

Si ou itumalo o lea ua faafofoga. Faafetai lava i lau Afioga i le Palemia, e tofofi lava oe e le Atua, tau ma oe i le tele o taimi, i le tele o luitau ma le tele o taufaifai, ia o lou malosia lena, o le tele o tatui e tatui ai, o le malosia lena o lau Afioga na tofofi ai e le Atua e te taitaia le sa o Samoa. Faafetai o lea ua faalogo si ou itumalo... si ou nuu lea o Laulii i taligalu ia, sa ta pese atu lava i le amataga, pese atu lava, ae faafetai, o fuafuaga ia a le Atua e o ese isi ae see mai isi e faatinoina mea e le i faatumuina. Ou te faafetai i le tali mai o lea ua faafofoga mai si ou itumalo, o lea o le a fai le taligalu. E ui lava o nuu o si ou itumalo, ae pei lava ona ou fai atu o le nuu lea Laulii e leai se aau, o le ava, toetiiti lava fafati galu i tuamaota.

Faafetai foi ua uma ona oo atu le Minisita, lau Afioga Tapunuu. E pei ta te fiafia lava a tau le Tapunuu o le sui usufono o le Vaimauga lea o le a e alu i le suafa Tapunuu. Pei e 2 sui usufono o le tatou itumalo lea e Minisita. E Tapunuu lava oe i lou pulenuu, a o le Tapunuu moni le mea lea e talanoa.

Faafetai lava i fuafuaga ia sa e faatino, lea na faatino, ua oo atu au asiasiga, ua silasila foi si o matou itumalo ua oo atu au asiasiga. E pei ona ou fai atu, o lea ua uma ona fai le auala lea i Letogo ma Maugafafia, ae ua sau nei la le vai ua le alu i tai i le auala ae ua sau ua pio atu i totonu o le aai i lologa ma timuga nei aua foi e leai ni alavai e o ai, ua pa la i totonu o le aai. Ua faasea lava si o matou nuu i Letogo, aemaise o la e i ai le faifeau i totonu, ina ua pa atu le vai. Ia faaauau lea tulaga faamolemole. Ua uma foi ona aveese fale ia sa e saunoa ai fale leoleo ma mea na, se i alu lava le alavai e tau i lalo i le vaitafe la e i lalo, faaauau se i mafai ona aafia atu ma teuteu atu nai vaega na.

Fagalii, faafetai i le galuega lea sa fai i si ou nuu o Fagalii, e i ai kamupani na sa faatinoina i le amataga lava o lenei Paeaiga. Ia pe ua galo ia Fagalii lea sa fai le tatou auala. O le mea foi lena e leaga ai le vave fai a o lea pei ua galo ma complain ai i luga o upega tafailagi fai mai e leai se mea na faia e le sui usufono. Oi a leai na fai atu Fagalii? Na fai atu lava alu atu gata i mea la e i ai flats a le Malo, e le i tau i uta i le mea la e i ai fanua la e nofo ai le alii lea o Fuimaono, i ou eleele, e le i tau i uta. Ae tatalo atu i lau Afioga, se i mafai ona tau teuteu atu i lenei taimi o timuga. E pei o le afioaga lea o Fagalii e pei ona ou fai atu o eleele apovai, tele le vaitafe. Ia, ae se i mafai ona... o lo o alaala ai ma afifio ai le tele o le atunuu i flats a le Malo aemaise o si ou afioaga e fia omai i galuega ma aoaoga, ae aafia i le galuega.

E faapena i Vailele faamolemole. Mo le silafia o le nuu lenei o Vailele, o le toatele foi o le mamalu o le atunuu o lo o afifio atu ona o le a? Lelei le pulega a alii ma faipule i le nuu lenei. Fai pisinisi a tagata, e i ai nai faipasi pe 3 ea pe 4 nai tamalii e fai pasi i le afioaga lea. O le auala lea e alu atu i luma o le auala lea e faafesagai ma le malae tapolo i Vailele lea e alu atu i Maalauli ia ma auala uma lava na e taloto i totonu o Vailele, ua matua malepe lava lau Afioga. Se i toe silasila ane, aemaise le auala lea e taamilo i si ou nuu o Vailele, i totonu o Vailele...

SUI FOFOGA FETALAI: Malie le sui usufono o lo o saunoa se i tulai mai le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o se mea e fia faamalamalama.

Lau Afioga i le Fofoga Fetalai, e taua tele le saunoaga a le sui usufono i itu lava ia o le uiga ese o le mea lea ua i ai le tau. Ma ou te manatu foi e lautele sau tautalaga o le a fai i le suiga o le tau, ona o le suiga o le tau lea ua avea nei o se mala aupito maoae lea ua feagai ma le lalolagi, e sili atu lava i lo le Koviti-19 lea ua ova i le 100 miliona tagata ua gasegase ai. O Amerika lava latou ua agai i le 26 miliona le aofai o tagata ua gasegase ai, ma le faitau miliona, silia i le 2 miliona tagata o le lalolagi atoa ua uma ai le latou soifua. A o lea e faapea mai taitai o le lalolagi, o luga atu o le Koviti-19, o lo o faamalumu mai ai le mala aupito maoae lea e faafeagai ma le lalolagi, o le suiga o le tau, suiga o le tau agai ina vevela, matua vevela lava. Masalo o le po anapo lea sa outou silasila atu ai foi i le maoae o le siitia o le vevela lea ua i ai Ausetalia, mu ai e silia ma le 2,000 eka o mea o laau i Melepone. Ma o le mafuaaga lea ua faigofie ai ona tutupu afi, ona ua alu ae i luga le vevela, vevela maoae. E faapea foi le mea na tupu i le vaiaso talu ai na faapapa ai fana a nisi o tagata sa tau e faatautee i le Amerika, ia, i le faaputugavao. Ia na ona uma lava ona faapa o le fana ae vaai atu ua oso ma le mu, lona uiga o le aloiafi e mafua mai i le masau o pulu ia a ua tupu ai ma le mu.

Lau Afioga i le Fofoga Fetalai, o le mafanafana ma le vevela lea ua tupu ai mea ia, o lea foi la ua matautia le mea lea ua tatou vaai i ai i le timu. E ono tupu ae ai se manatu, o le a le mea ua faapea ai mea ia? A o le sau o le vai lea e sau ai, ua sau faalautatai, sa le masani ai. Na ona timu lava i uta sau pei ua vaitafe lava mea uma. O isi foi ua le oso mai i alia ae ua sau i le tulaga faapena. E oo foi i le matou nuu, ua sau i totonu o le nuu, i tamai timuga lea na uma atu nei. O lona uiga, o lo o alalaga tatou i totonu o le taulaga, a o lo o faapena foi le tele o nuu. O le matautia lena o le mea lea ua tupu i le lalolagi i le taimi lenei i le suiga o le tau, ona o le mafanafana, ma o le mafanafana lena o lea e tutupu ai ma afa ia e aafia ai tatou, oso mai ai ma Tsunami ma mafuie, ua le iloa e le lalolagi le mea lea ua tupu. A o lea e ia i tatou le fofo, ua tatou iloa le fofo, a o lo o i ai le agaga musua, maaa o loto o taitai lea e afua ai mea ia, ua tele le tatou galuega ua fai i le sao taua e tatou te fesoasoani ai i isi nuu o le lalolagi, a o le tatou sao taua, taofiofi le ta o laau, ia faatutupu pea laau, leaga o le laau lea e mitiia e laulaau le kaponi tatou te manavaina ae luai mai i fafo le okesene tatou te manava ai le manava ola. Ia ma o lea la ua tutupu ai mea ia, mea tatou te faia i o tatou lima a ua aafia ai ma le soifua.

Ua ala la ona ou taua le itu lea, ina ia tatou nofouta i le matautia o le mea lea i le agai atu i le lumanai. E tele lava fautuaga ua aumai e latou o Saienitisi, a o i foi e tupu ai pea mafaufauga, e le tupu fua mea faapea. O le pese lena a le EFKS, e i ai mafuaaga. Aisea? Ua tele mea ua tatou faia, faia e le lalolagi, e le ogatasi ma le finagalo o le Atua. O nisi o mea sa matua tapu e le Alii ma faapapateaina ai le tele o nuu i le Feagaiga Tuai, e afua i uiga tonu lava ia ua tatou faia, pasi tulafono i le tele o atunuu o le lalolagi, ua matua fulitua i le Atua ma ana Tulafono.

Lau Afioga i le Fofoga Fetalai, o le tulaga lena, e tupu pea mafaufau, tupu pea mafaufau, e faatupu manatu i le mea lea ua i ai le lalolagi i nei onapo, e le tupu fua mea ia. O le ala foi lena e faataua atu ai e le Malo se i tau fai ia ma tatou amanaia le aso Sapati, a o lea foi e fagufagu mai, talepe le aso Sapati, ae talepe le aso Sapati i a tatou faiga pisinisi. E 6 aso o le vaiaso e sue ai tatou seleni, a o se aso lava e tasi na fetalai mai ai lo tatou Alii, tausi le aso Sapati, o le aso Sapati e malolo ai le tagata ma toe faafou ai lona soifua, ua silafia lelei e le Atua vaivaiga e tataua ona toe faamalosi, o lo o i ai le fofo e toe faamalosi ai le tagata, malolo lelei. E tai pei foi ona aumai i le Tusi o le Feagaiga Tuai, e i ai foi le Sapati o le eleele, e 6 tausaga e faaoga ai le eleele, o le tausaga 7 faa-Sapati le eleele, malolo. Aisea? Se i toe saili e aa laau ia minerale e fafaga ai le eleele, fafaga ai le eleele ina ia fua lelei fuga o laau, ma e fai foi ma le sapati a laau latou. O le ala lena e fua ai a tatou mago ma a tatou vi, a uma ona fua, ona sapati loa lea e malolo. Ae a? E saili le minerale e mea o aa laau e toe faamalosi ai le laau. E faapena foi la ma tatou, e manino le Sapati ona e silafia e le Atua e tataua ona aumai le mea lilo ia i tatou ina ia toe malosi ai le tagata, ia ma se i mafuta lelei ma le toalua ma le fanau, ma se i o i le falesa e faafoi i le Atua le faafetai ma le

viiga. Aisea? O lona alofa ua tatou maua ai le ola fiafia i le lalolagi nei mo se taimi puupuu, a o le ola atali i le lagi mo i latou e faamaoni, ia ma le tau i foi ua talafeagai mo i latou e latou te faaoloataua isi tagata. Ia manuia le Fono.

SUI FOFOGA FETALAI: Malo saunoa i lau Afioga, ua manino nisi o vaega uma i le faafofoga a le Maota.

Ou te tapa lau Afioga i le sui usufono mo Vaimauga Sasae e faaauau le saunoaga.

Afioga SULAMANAIA FETAIAI TAUILILI TUIVASA: Lau Afioga ua ou oo atu i le Afioga i le Minisita, o lea foi ua malele le Afioga i le Taitai ma faamalamalama nisi o vaega. Faafetai lava.

I le Minisita o tatou Eleele, o le isi lea ou malosiaga, na ou sau lava ou tatalo atu, faafetai o lea ua e tali mai, o le a faapena ona faia tulaga i o matou eleele. E pei ona ou tatalo atu i le ulufale mai i lenei Palemene, pau lava lenei o le itumalo na omai lava Siamani naunau i o matou fanua. E mafua i se a? O lo o i ai le tamaoiga ma faamanuiaga a le Atua i le matagofie. E le i omai Siamani o i isi afioaga ma isi itumalo, sa omai lava... O lou la agaga faafetai i le Malo o lea ua toe faamatuu mai lava o matou eleele i le pulega a alii ma faipule. Faafetai le faaso, faafetai le manatu mai. O lea foi ua saunoa lau Afioga i le Minisita, ia, e faiaso le Atua. Na pau lava le mea la e sa tatalo atu ai le sui usufono, o le tau, a o lea ua e saunoa mai, faafetai lava, o lau pule lea. O lea foi ua sauniuni le Afioga i le Minisita o le Samoa Land e toe tufa isi o tatou fanua la e i tuamaota o tatou, aemaise afioaga ia o Vailele ma Letogo, a o la e faaauau lava ona tatou nonofo lava tatou ia ma tatou galueaiina. Faaauau pea lena... se i oo i le taimi e faatino ai fuafuaga a le Malo. O le agaga lena o le faafetai i lenei Faigamalo.

SUI FOFOGA FETALAI: Malie le sui usufono se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, i se taimi ona saunoa atu lea o le Minisita i a latou faiga faavae o i ai nei, ne i te i ua seetia nisi i mea o lauga saili ai i lenei taimi, ae se i oo foi i le taimi e saunoa ai le Minisita ona faamalamalama lelei atu lea ina ne i te i ua taitaiseseina ai foi le faafogafoga mai a le atunuu.

SUI FOFOGA FETALAI: Ia, masalo o lena ua manino auofala. O lea ou te matau atu foi, o le galuega a Minisita o lo o faamaumau uma, a oo la i le taimi e tulai mai ai ma tali le Malo, ona faamanino lea o tulaga uma. Ae faaauau le saunoaga a le sui usufono mamalu.

Afioga SULAMANAIA FETAIAI TAUILIILI TUIVASA: O le itumalo lenei aemaise lava le vaega lea e tau o Maugafiafia, e momoli lava lou agaga faafetai i tuamaota ia o Vailele ma Letogo. Masalo a matau lava lea foi ogaeleele o lo o tau o Maugafiafia i o matou tuamaota po o le mea lea sa ave i le taimi o Siamani lea ua toe faafoi mai, o le tele ia o le mamalu o le atunuu o lo o aofaga mai ma fia nonofo ai i i. Masalo foi a fesiligia lava le tele o Ofisa Sili o Pulega o Matagaluega a le Malo o lo o i ai, o i. Ona o le a? E faamanuiaina eleele nei. E faatusa le itumalo lenei pei o Isaraelu. E fia o lava tagata e fau fale i luga o le mauga, e faatalitali i le taimi e afio mai ai Iesu, fai mai a latalata e muamua lava papai atu i ai latou ia i luga i i. Faafetai atu ai i le Afioga i le Ofisa Sili o Pulega lea ua tofia e pei ona ou fai atu, o le itumalo lenei e faamanuiaina...

SUI FOFOGA FETALAI: Malie le sui usufono mo Vaimauga Sasae, se i aumai se faamaninoga.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ua ou toe tulai atu i le sui usufono o talosaga se i foi mai luga o le mauga se i ma talanoa i lalo o le auvae mauga.

E i ai lau tala lea o le a fai atu, o lou sasi tele lava lena na i ai a o ou vaai le SLC. E i ai le toeaina na alu atu ia te au i le vaai e i ai nai mea o avanoa i le itu lea e alu ai nei le pa solofanua, se i tulou, i Tuanaimato. Fai mai lea o le toeaina, “Tui, na o si tamai mea lava lele e i talaatu e toto ai nai au taamu, o lea ou te nofo i tafatafa i i.” O lea la ua oso mai ia te au le alofa, ua sau i lou fatu lau faaiuga, a ua le sau i lou mafaufau o lo o i ai le faamasinoga tonu. Ona ou io loa lea i ai. E le i umi ona amata le tamai puputalo a le toeaina ae tu le isi faifeau e tulata ane i ai, “Tui, ou te mana o e fai se matou maumaga ma se togafai tele i talaatu o le mataupu a le toeaina lea.” O i ina na amata ai loa ona ou iloa ua ou sese, a o lea ua ou kofesio atu i totonu i i, e leai se atoa o ia te au. Ona ou fai atu loa lea i le faifeau, “Malie e le mafai ona o lea o le a i ai le fuafuaga a le Malo.” Tu loa i luga le faifeau ua toatamai, ona savali loa lea o le faifeau tu i le faitotoa o le a tatala ae toe tapuni mai ma liliu mai ia te au ma tautala mai o i le faitotoa, “Lau Afioga i le Palemia, a ou alu la faamalosi ma lau autalavou e fai faamalosi sou toga taamu e pei foi o le toeaina lea i le pausisi la o lo o i ai, e te taofia au?” Ona ou fai atu loa lea, “Ou te le taofia oe leaga o oe o le faifeau, ae o le a ou tuua i le Atua o le mauga o Sinai e faamasino oe, o oe o le faifeau, e faapefea ona e toe lauga mai luga o le pulelaa i le amiotonu ma le tausii o le tulafono a o lea e solomua oe ona e soli? Ona fai mai loa lea o le faifeau ia te au, “Tui, e mamafa le avega ua e tuu mai ia te au.” Ato loa ma lou faitotoa alu i fafo. O le mea na ou fiafia ai, e le i faia sana faatoaga. Ae muamua atu la i le toeaina lea, na omai ai ni matai ua ou le manatua nei po o Letogo po o Fagalii, “Ae

a pe a e malie, fanua ia o le Esetete Tausi, na o nai mea lava e toto.” Ou fai atu, “E i ai fuafuaga a le Malo lena e fai i ina, o eleele o le Malo.” Ona fai mai lea ia te au, “E leai a uma lava a matou faatoaga o le a lava le mea ma te o ese lava Tui, talitonu mai.” Ou fai atu loa, “Ia manatua la a tatou upu.” E atoa ea le tausaga ae faagasolo loa fuafuaga ia a le Malo, ou alu loa ou tietie i o, ou tietie atu, se ua soo atoa le mea, e avatu i ai le faatonuga, o ese loa o le a fai fuafuaga a le Malo, oi ua leai.

O le ala la lena o lea e faafitauli ai pea tulaga ia, ma o le tulaga foi lena o lea e faifaimalie ai e le SLC ma ua oo ai le SLC i se tulaga faigata tele i mataupu nei faatatau i eleele.

Lau Afioga i le Fofoga Fetalai, o lau kofesio lena. E pei ua avea lou alofa ma mea la ia e tutupu mai ai faafitauli nei i mea tau eleele, ae aumaia lava e le Atua le laolao e toe faatonutonu ai mea ua faaletonu.

Lau Afioga i le Fofoga Fetalai, ia o le tulaga lena, o le ala foi lena na ou vave tu atu ai, ona o la e ua galulue ai le toatele i ni faiga foi ia fealoaloai. Ae i ai foi la ma Vailele na fai foi tulaga faapena e le SLC, ae ua ou te i i le isi aso, masalo po o le tausaga e... e pei lava o le tausaga e 1999 po o le 2000, ua ou te i lava i le oo mai o le isi toaina matua lava o Vailele, e i ai lau 2 kuata eka lea e fia faatau atu ia oe, tau mai ma le tau, o le taugofie. Na ona alu lava ou telefoni i uta i le SLC, se i tilotilo ane lava i... Ma lou tilotilo atu, o eleele ia na faamatuu atu e le Malo i se tulaga foi lea faa-lisi e galulue ai Vailele. O le ala la lena o lea ua toatele ai tagata mai i ma o e nonofo aiga ma faatau i ai lisi, na avatu e ola ai Vailele. A o le tulaga la lena, ua toe nonofo ma faatau, aua e tetele tupe na maua ai ae sa avatu e le Malo i se tulaga e gafatia. O le ala lena o lea ua fai i ai le isi faiga lea a le SLC, e le mafai, le mafai le mafai ona talia ni mea faapea e toe tutupu mai, ona e faamatuu atu e le Malo ia soifua lelei ai o tatou tagata o afioaga ia, a o le mea lena e manao e momotu atu, ina ia faatau loa, aua e faatau loa i le taimi lenei ae faatau i se tau tele lava. E le o manao la i se fanua e olaola lelei ai isi ia, ae manao e sue mai le tupe e ola ai i le taimi lenei. O le mea o le manatu faapito, o le mea lava lena o lea e afaina ai mea nei o aiga.

Lau Afioga i le Fofoga Fetalai, o le faamalamalamaga lena ou te lagona, se i i ai se taimi ona faamalamalama atu lea atili e le Minisita. A o eleele nei, o eleele e aia i ai le Falealupo, o eleele o le Malo, o eleele foi e aia i ai le Fagaloa, o tatou tagata uma. A o lea lava e fai, na fai lava i le avafatafata afioaga o lea e tuamaota i ai eleele nei.

Lau Afioga i le Fofoga Fetalai, e pei o le tulaga lena. E le mafai foi i eleele ia ua aumai i le Malo ona toe fai i ai se isi faiga i le tulaga foi lele o le ave faamalosi, e faafoi faamalosi. Aua tai pei o eleele nei, omai lava Vaimoso i se isi taimi, o eleele ia o matou. O le tagata la na te folafola, e oo mai loa i totonu e fai le Malo toe faafoi uma eleele ia. O lona uiga e aofia ai ma eleele o tagata ua umia taitoatasi o latou eleele. Malie i latou e faia ia mea, soia tou te taufaavalea.

Lau Afioga i le Fofoga Fetalai, o le faaiuga lena o lau faamalamalama.

SUI FOFOGA FETALAI: Faafetai tele i le saunoaga a lau Afioga i le Taitai o le Malo. Ou te manatu e taua tele mo le faafofoga mai a le mamalu o le atunuu aemaise lenei Maota. O le faafitauli ia o lea e tulai mai, o lea ua saunoa, faamanino ma faamalamalama e lau Afioga. O le agaga faafetai lea.

Malie le sui usufono mo Vaimauga, talu ai o lea ua tatou taunuu mai i le tatou malologa masani, o lea ou te faasilasila atu ai, o le a faataatiaese Galuega a le Maota mo lana malologa masani mo le 15 minute toe taliu mai e faaauau le tatou Galuega. Ma le faaaloalo.

Na faataatiaese Taulumaga a le Fono Aoaofaitulafono mo lana malologa masani i le itula e 10:50 i le taeao ma toe faaauau i le itula e 11:35 i le taeao.

Na toe faaauau felafolafoga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.

SUI FOFOGA FETALAI: Ou te faasilasila atu ua toe amatalia nei Taulumaga a le Fono Aoaofaitulafono.

Ou te manatu o lea ua maua foi se faasiliga malosia e le paia o le Palemene aua le faaauauina o le tatou galuega i lenei taeao. E faataatiaese Taulumaga o le Fono Aoaofaitulafono o saunoa le sui usufono mo Vaimauga Sasae. Ou te tapa le sui usufono e tulai mai e toe faaauau lau saunoaga.

Afioga SULAMANAIA FETAIAI TAUILILI TUIVASA: Faafetai i lau Afioga i le Fofoga Fetalai. Masalo o lea ua maea palegaauau le taliga o le sua i lena tala na atoa i lau Afioga i le Taitai, aemaise foi o Minisita ma le paia i sui usufono o lenei Maota. Ae ou te tulai i lenei taeao, o lea o le a amata le lauga a Vaimauga, ua iloa foi o le lauga lenei e poloka loa e tatau lava ona toe amata.

Lau Afioga i le Fofoga Fetalai, e momoli le agaga faafetai o lenei itumalo i le Komiti Faapitoa o lo o tofofi e le tatou Malo, le Afioga i le Palemia ma le Kapeneta e puipuia le faamai. O tamalii ia o lo o taitaiina e le Afioga ia Samau aemaise o le Afioga ia Agafili. O le mitamitaga o lenei sui usufono o sui o lenei itumalo.

A vaai lava ma le totoa i le taimi e faatino ai ia lenei auaunaga i le malaevaalele e maligi loimata i le mamalu o le atunuu o e o lo o ofoina le soifua e auuna i le taimi e taunuu mai ai se faigamalaga, e le gata i le vaalele ae o se vaaalalo foi pe a ulufale mai i totonu o Samoa. E o lava ma le le fefe,

e faamavae ma o latou aiga ae o lava e feoti ai. E mafua i se a? O le alolofa ia Samoa, e le kea i le fanau ma le toalua, e fai lava le tautua. Faamalo i tamalii o le atunuu ma e o ofo le soifua i so o se Matagaluega a le Malo, feagai ma le maavaalele ma le Ofisa o Falemai, Ofisa o Tiute, Ofisa o le...

Tofa Olo Fiti Afoa Vaai (Salega Sasae): Lau Afioga i le Fofoga Fetalai...

Afioga SULAMANAIA FETAIAI TAUILILI TUIVASA: Fai lava le auaunaga, leai ma se popole, o le agaga la lea...

SUI FOFOGA FETALAI: Malie le sui usufono o saunoa le sui usufono o Vaimauga se i tuu atu lava le avanoa i le sui usufono o Salega. Se i saunoa le sui usufono o Salega po o le a le mea lea e tulai ai...

Tofa Olo Fiti Afoa Vaai: Faafetai mo le avanoa, faamalulu atu i lou sui usufono ona o lea o le a see ese ia lana mataupu mai i le mataupu muamua sa ou faalogologo atu ai o augani le uso mo mea o eleele ia ma fanua foi nei e sao. E pau lava le mea lea lau Afioga i le sui usufono, ia o la sa ou matau atu i le Minisita, e le o tusitusiina i lalo mea ia sa e finagalo i ai, ae o lea ou te faamaumuina uma.

SUI FOFOGA FETALAI: Ia faafetai o lea ua maua e le Nofoa le sui usufono mamalu Olo Fiti. O lea ua maua ua maea ona e saunoa, taoto pea lau mataupu se i tali le Malo.

Tofa Olo Fiti Afoa Vaai: Ae o le isi mataupu lau Afioga, o lea ua maua e te...

Afioga Hon Lautafi Fio Selafi Purcell: Lau Afioga i le Fofoga Fetalai, o le mea e fia faasao lau Afioga...

SUI FOFOGA FETALAI: Malie le sui usufono mai Salega se i tuu atu le avanoa i le Afioga i le Minisita.

Afioga Hon Lautafi Fio Selafi Purcell: E ese lava mea a Olo la e tusitusi, o lea ou te tusitusiina uma lava mea na saunoa mai ai si ou uso le la leaga o le sui usufono lea, talu lava ona tofi mai i le Maota, o lana mataupu lava lea. E tu loa lava i luga le sui usufono, saunoa mai i mea tau fanua. E na ona toe sue lava o lau page i le vaiaso lea i le Fonotaga lea na tea, o la e i ai uma lava manaoga o le sui usufono mo Vaimauga. Olo aua e te popole o lea e maumau uma i lalo i i, ma lou faaaloalo.

SUI FOFOGA FETALAI: Faafetai.

Tofa Olo Fiti Afoa Vaai: Lau Afioga e toe tasi lava si mea lea sa ou fia malamalama ai i le saunoaga a le sui usufono. Ia ou te faaamulia i lou uso a sui usufono ma lona ia tulaga i ona eleele ma tulaga faapena, manatua o lea sa i ai ia le tatou Tulafono foi lea na liliu mai ai ou eleele i le Malo faa customary land, lea na manuia ai ia lou itumalo, faatau tai \$35,000. Ia o lea foi e manuia ai ia le itumalo o Vaitele, manuia ai ia le Afioga i le Palemia, manuia atu ai ma Leala...

SUI FOFOGA FETALAI: Mataitu atu ma le faaaloalo i le...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai o se mea e fia faasao...

SUI FOFOGA FETALAI: Se i alala mai i lalo le se i tulai mai le Taitai o le Maota. Saunoa lau Afioga.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: O le mea e fia faasao, o le mea lea e leaga ai mo le osovale mo le sui usufono. O eleele ia tau Vaitele, le afioaga i Vaitele, o lea ou te matau nei po o le 1982, 1983 na fai ai le iuga a le Malo i le afioaga lea o Vaitele. Manatua foi lau Afioga, o le afioaga lea i le 1900 na tetei ai Vaitele, ua oatu ia le aufaipisinisi fua o latou eleele. Ae tetei ua faatau e Tupua Tamasese Titimaea ia eleele ia tau Vaitele e faatau ai ia mo mea o fanafanua e tau ai le taua ia sa fai i le taimi na e aafia ai ma le taua o le asotasi.

O lea la ua i ai faamaumauga ma ua lotea soo ia le mataupu lea i totonu o Faamasinoga. Na lagalaga ai ia le nuu o Vaitele masalo ana le vave atu ia leoleo i na onapo, e i ai faalavelave e tutupu, ona molia ai lea e le afioaga lea o Vaitele ia le tulaga lea i le Malo, na tau ai lea i le vaitau lena o nisi o eleele i Alafua, ia faapena foi nisi o eleele i le isi itu lea i Moamoa i le nuu lea o Vaitele ma le latou sao o le Afioga ia Mataia. O lea sa nonofo ai lava i ina to i ai ma le 8 eka lea e i i Lepea, mea lea e i ai ia le tia a le Afioga i le Tama a Aiga na maliu fasia i le taimi lena na tagatavaleina. O lona uiga o le fanua tau Vaitele lea e teu ai ia Tupua Tamasese ona o le tulaga i piitaga ia atu o le Mataia i Vaitele, Mataia i i Vaimoso e i ai foi ma le Mataia i tua i Falealili. O gafa uma ia o le aiga Sa Mataia.

O lea la sa to ai e le Malo eleele nei. Ia ae manatua foi la, e ui lava ina faapea o lea ua tuu i ai isi eleele ia, pei lava e 30 eka la e totoe i le taimi lenei i Alafua ma nisi o nai eka i Moamoa tafa o le mauga e agai atu i Moamoa, Sinamoga ae e le uma lava ia le anava a le afioaga e toe fia foi lava i o i le mea na ala ai ona soifua mai ia o latou tuua.

Na i ai la faamasinoga i le 1930 faasolosolo mai ai e tau mai lava i le 1986, ia toe faasolo mai i le taimi lenei, e le i leva atu ona amata ona faasolo faaiuga i le nuu lava lea o Vaitele, ona e i ai lava ia le agaga tagata e toto Vaitele, e toe fia foi lava i eleele o le latou tofi lea mai i le Atua. O le ala la lena o lea e faatupu mai ai lava ia manatu o le afioaga agai i le SLC, ma o le mafuaaga foi lena sa fai ai iuga i lena taimi e le latou sui usufono o Toi, ona fai ai lea o eleele i le tulaga faalisi agai mai ia Mataia ia ma o latou auaiga i Vaitele. E i ai foi la ma le ¼ eka a si o matou aiga si ou toalua ona o le loomatua, o le loomatua o le aiga Sa Mataia.

Lau Afioga i le Fofoga Fetalai o le ala lena, i se mo se mea o se manatu foi lea e aumai e faapea e faaoloataua ai le atunuu, o au ua malamalama tele i le tama lea o Olo, e na o mea leaga, mea leaga, mea leaga e pau mai i lona fofoga. O lea la ua ou avatua le tulaga, e i ai foi la latou, ua nonofo ma faatau isi eleele po o taumafai e faatau, e le o ni tagata Vaitele ae o lea e nonofo ai i i i eleele ia, o lea na ou faalogo ua faataoto ai se faaiuga e taofia ai ia le toe faatau, ona o aso nei o lea sa faamatu mai i tulaga aua sa faatau eleele i le tausaga e 1991. Sa amata ai loa ona faatau eleele i i. E 1,000 ia ¼ eka sa faatau atu i se tau ou te manatua pe \$32,500 i le ¼ eka e maua ai le tele o eleele o tagata mai i o Savaii, tua ua maua ai ni eleele e nonofo ai i le taulaga, ia ma faaaoga ai fanau aemaise foi o a latou galuega.

E uma le 1,000 muamu lena, ua maua ai foi ma le seleni e faatino ai le galuega tele lea sa fai, i le fausia atoa faaneionapo o le eleele lea sa tu ai le faatoaga lea e i ai nei ia faletaalo i Tuanaimato ma mea o malaetaalo. Sa i ai foi le vevesi i ina, ona ua oatu isi ua faaoloataua isi, na oatu ai ma laau malosi. O lea la na o ane ai loa leoleo ma ao uma mai latou na sa faatupu faalavelave, ae o le taimi lena o la e aoga i le kindergarten ia Olo. E le malamalama i mea ia. O le aoga foi la lena o lana faatupu manatu...

Tofa Olo Fiti Afoa Vaai: Lau Afioga i le Fofoga Fetalai...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielega: Lea ou te faamatalaina ai mea ia, ia matua malamalama lelei i ai Olo ona o le tasi nei sui usufono...

Tofa Olo Fiti Afoa Vaai: Lau Afioga i le Fofoga Fetalai, ou te le i kindergarten i le taimi lena.

SUI FOFOGA FETALAI: O le vala lena o lea ou te fia...

Tofa Olo Fiti Afoa Vaai: O lea ou te talanoa i le Tulafono na manuia ai le vaega lea.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga se i maea atu

SUI FOFOGA FETALAI: Malie le sui usufono se i maea lelei le saunoaga o le faamalamalaga ona e saunoa lea

Tofa Olo Fiti Afoa Vaai: Ae nonofo le atunuu e le maua se mea.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Se i faamaea atu le mea lea ou te avatua, ona lau Afioga i le Fofoga Fetalai, ou te maua uma lava ia latou faasalalauga ia e fai i fafo. E uma atu loa ia le tatou Fonotaga, fai ia latou fonotaga i fafo ma ave atu ai ia lenei ma lena.

O lea la e faatupu manatu i le autusitala, lea e oatu lava latou. Ou te le o manaomia foi le oatu ia te au. E oatu e faalavelave atu o lea e tele ia au galuega. Ae o latou lava lea e usu i le autusitala, ona oatu lea na ou tautala o le a le mea e tou te le o ai i o i le la vaega? O le latou tala ia o le a matou o i fea o lea e maua uma i inei ia faamatalaga uma e fai e lo tatou Malo. Ou te le valaauina latou, ae o latou lava e omai. O le tulaga la lena leaga o lea na ali ananafi, ua pei ua ou puleaina uma ia le TV. Ou te le o pulea ni TV, ou te le o pulea foi ia ni tusitala. Ae e omai faatalanoa au, ia leaga o au lea na tofia e le vaega lenei e ave ma Taitai o le Malo. O au la lea e matou te faitonu ma le Kapeneta, malamalama i tonu uma e tali atu ai mo mea o tuuaiga sese ia e fai nei, ae o lea la ua taua tele le lagalaga mai o mea nei i le Maota, faasao uma atu ai lava ia mea sese ma talaiga sese ia e fai o lea e faafogafoga mai ia lo tatou atunuu i tulaga ia.

Lau Afioga i le Fofoga Fetalai, o le sao lena o vaevaega ia e fai i eleele e faatau ia $\frac{1}{4}$ eka ma o le agaga foi na o lea e i ai i le Komiti lea, ou te le o Minisita ai, ou te le o Minisita ai. E pau lava le taimi na ou Minisita ai o le amataga, ona ou see ese loa lea ae tuu atu i isi Minisita e latou te faafoeina ia tonu fai. O lea la e i ai le manatu lea e pei e sili ona faatinoina loa le faiga lea, a avatu loa le $\frac{1}{4}$ eka lisi i le aiga, ona fai lea o se faiga ina ia le mafai ona toe faatauina atu lau Afioga, e pei e lisi atu, oi e pei e faatau atu o le fanua lava motu, ae faaoga faaleaganuu. O lona uiga, e tataua ona teuteu ai foi ia tatou Tulafono. O lona uiga, e le mafai, le mafai ona faatau ese ae o le a agai lava i ai fanau a le toeaia ia ma le loomatua e oo lava i le faavavau. Agai lava i ai fanau, e le mafai foi e se isi o latou ona toe faatau, lea la e teuteu ai Tulafono i se tulaga talafeagai tatou te fesoasoani ai i e vaivai ona o le manao tupe i le taimi lenei ae mamulu ai se meatotino.

Lau Afioga i le Fofoga Fetalai, o le tali atu lena faamalamalama.

SUI FOFOGA FETALAI: Manatu ua manino auofala i le saunoaga a le Taitai o le Malo, ia e le toe tau faamaninoina foi ia lea mataupu. E i ai foi le lagona o le Nofoa, o lea ua leva ona see le sui usufono o Vaimauga i le

mataupu lea, fou le mataupu lea ua agai i ai. O le mea lea, e le tatau ona toe taea i se saunoaga ia o lea ua aumai le faamaninoga, ia ua malamalama mea uma.

Lau Afioga i le sui usufono mamalu mai Vaimauga Sasae, ia faasee mai loa i luma lou sa ma agai loa e tau faaiu ua toe 5 ou minute.

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai e momoli le agaga faafetai, e pei ona ou taua lenei faamai o lo o vavao ai le lalolagi. Ae a Samoa ma lana tapuaiga? O lo o malu lava. O le ala foi lea sa avatu ai le faafetai i tamalii ia o lo o taiulu ai lenei Komiti faapitoa aemaise o e uma o ofoina le ola e auuuna mo Samoa, e leai lava se mea o gase. E leai se mea o tupu i totonu o Samoa. Ua avatu foi ia talaave i si o tatou atunuu i atunuu i fafo e ta te mimita ai. E leai se faamai i totonu o Samoa. Ae a? Se i tulou le Maota lenei. E na o puisu ia e maua, o le isi puisu e negative, ae o le isi puisu e positive e ese le manaia. E ta te fiafia ai ua alu ai ia talaave o Samoa. E leai se faamai, o le agaga faafetai lea i nei tamalii. Ae a fesili o fea e omai ai? O tamalii lava o lenei itumalo o Vaimauga i Sasae.

O le ala lea e ta te meeme ai, i totonu o lenei Maota o tama fanau a lenei itumalo. O lea lava e solisolimuliaao lava lenei sui usufono i mea na asa mai e o matou tuua. E omai e lagolago ia lenei Vaega Faaupufai o tuua ua mavave atu. O lea foi e tele lava ia faamanuiaga a le Malo e oo foi i eleele lea, o le mea lena sa le toe afea ai se manatu. A lea ua faafofoga si ou itumalo o lea ua malele le Afioga i le Palemia o le auga ia o le faamoemoe.

E oo foi i o tatou taligalu ia na tatalo, tatalo ua a nei? A lea o le a amatalia, o lea ua faamatu mai e le o se isi o finagalo, malele le Palemia o le a la le? E masalo e umusa ifo le tatou taligalu lea ae fetui ma le faiga o le faiga palota. E le o galuega e toe sau ai le sui usufono leaga o le tama lava o le eleele. Samoa ma le tou faafofoga ia e momoli le agaga faafetai i Ofisa Sili o le Malo, faatalofa foi i lenei ituva'i o si o matou itumalo o Maugafafia i tuamaota o Vailele e pei ona ou taua, a fesiligia lava ia Faauluuluga o Matagaluega o le Malo i CEO, pe 10 ea CEO ia e omai i i. Mai i fea? Mai i faamanuiaga a le Atua i tama fanau a lenei itumalo.

Faafetai foi i le faaeaea lea ua tofofi ai, ua uma atu le isi uso faaletulafono lea sa pule i le MNRE ae o lea foi ua tofi ifo le isi teine o lenei itumalo. Faafetai, faafetai le faaeaea i lenei itumalo ma ana tama fanau. Leaga e solisolimuliaao lava. O totonu foi o le Malo sa tumatie lava Faauluuluga o Matagaluega a le Malo, e a Pilimai Tupae Esera, tautaua i le Matagaluega. E a Tuisuga Letaua i le Matagaluega o Faatoaga, na iu lava ina sau Palemia... oi sau Minisita Sinia mai fea? Asua Malaki Iakopo, Tate Lemalu Simi, mai fea ia? Mai i Vaimauga lenei.

A oo foi i tulaga i le aoaoina i totonu o Samoa se i tulou le Maota lenei, e leai lava se Loia sili ona atamai, e na o le tamalii o lenei itumalo Maposua

Solomona Toailoa. E leai se loia e faiaina, so o se case lava e maea ifo lava e manumalo, mai fea? Mai Lauili i le Vaimauga. O le mea lena e meeme ai, e ta te tu lava... e pei o le ala lena lau Afioga i le Fofoga Fetalai e fia talanoa lava i le matagofie.

E oo foi i taaloga, e i ai se isi? E i ai se pue silisili e pei o le tamalii o lenei itumalo? O lea foi ua faaea i ai le tai toafitu, saunoa le sui usufono lea e vaai ia le tai toafitu o lea ua sao ia le filifiliga o le tamalii lea. Leaga sa aumai papalagi mai fafo o lea la vaai Samoa lea ua sao le coach lea. Mai fea? Muliagatele mai i Letogo. E pau lava le tagata e tulua atu lana taalo i le tamalii lea o Letogo, e na o lou uso faaletulafono ia Loau Sio Keneti. O lea la lau Afioga aemaise le Taitaifono o ou uso faaletulafono, le Afioga i le Taitaifono o le Iuni Lakapi. O le ala lea e ta te mimita ai, o le tamaoiga o lenei itumalo ia e faafetai i mea ua maea i lenei Nofoaiga.

E pei ona ou talanoa, o lenei Tulafono e pisa ai ia si o tatou atunuu, ia e so o se Samoa e matua mitamita lava. E mitamita ua taulia ia Pulega a Alii ma Faipule i totonu o le Faavae. E le gata i lena, ae o mea sa naunau i ai ia o tatou tama. Ae o ai e faia ia le faaiuga? O ai e faia le faaiuga? E fai i le faamaoni o Afioga i Alii ma Tamaitai Faamasino. E le aiaina e le Malo, tuu le faamaoni i Faamasino aua o le tele o taimi e le faamaoni foi ia Pulega a Alii ma Faipule, pule ma le sau. Ae faafetai o lea ua i totonu o le Faavae, e fai lava le faamasino sili ma le faamasino tonu i Afioga i Alii ma Tamaitai Faamasino o le Faamasinoga o Fanua ma Suafa ua tuu i ai le faatuatuga. O le ala lea o lou fiafia ina ua ou maua mai.

Faafetai foi i le tamalii lea o Aeau lea e... vaai atu i le toe ulutaia o lenei Palemene, ou vaai atu i totonu o le Fono Faavae, e tautaua lava ona finagalo i totonu o le Fono Faavae. Aeau lea sa i totonu Taulupoo, lea e i ai le suafa lea Aeau. E mitamita lava pe a tau le suafa lea Aeau, leaga o le isi tamalii lea e faitau oka, tele ona finagalo i le 102 lava lea. O lea ua fai mai isi ua faoa ia o tatou eleele se e leai, o la e malu ia mea na fai e o tatou tuua. 102, e lote loa pe faatauina pe o le a le tulaga e fai i ai, tapa lava le $\frac{2}{3}$ o le atunuu i le a? Pelepesite, po o le a foi le mafuli o le Palemene lenei i le $\frac{2}{3}$, e le mafai, faamolemole e le mafai. Leaga na fai e o tatou tuua. Leai se isi augatupulaga seiloga e fesiligia ia le $\frac{2}{3}$. O le ala lea o lou mitamita ma ou meeme.

Na ou oo mai i le Palemene lenei i le isi mea matautia sa i ai i totonu o le tulaga lea o le aveeseina o le Peresetene po o le Faamasinoga. E faitau atu o la e i totonu o le Faavae, e le mafai ona aveeseina le Faamasino Sili po o le Peresetene o Faamasinoga seivagana ia le $\frac{2}{3}$ o le Palemene lenei. O ai na faia? Na fai e o tatou tuua ua mavae atu, e le i faia i le Paeaiga lenei. O lea faatoa faatino i le Paeaiga lenei mea na moemiti ai ia o tatou tuua, e le mafai lava seiloga lava ua fulisia finagalo o le Palemene lenei i le finagalo o le tofa ma le faautautaga, o le a le tali? O lea lava na tu malosia ia le Malo le Palemia ma lana Kapeneta e aveese, faamuta ia le auuanaga a lea tamalii. Ae o le

a le tali i finagalo o Samoa nei? O le mea lena na aumai ai oe, o le faa Samoa lea e faatino i totonu o le Maota lenei.

O le mea lena e ese ai lenei Palemene, mai Samoa aoao lava ma le lalolagi. O isi e i ai le fale muamua ma le fale lona lua, ae a Samoa? E tasi lava, e tasi lava e le fesiligia faaiuga. O i inei e faia Tulafono ona faatino lea e le Faamasinoga. O lou mitamitaga lena, faafetai ua ta i ai, ua ta i ai i totonu o lenei mea na valoia e o tatou tuua, a lea na faatino. O le a le tali a le atunuu? Toe foi le auauna lea, foi le tamalii lea e faatino lana auaunaga, ona o le a? Faa Samoa lea, lea na fai ai le finagalo lava o le sui usufono na sau ai. O le agaga lea e meeme e o lenei sui usufono...

Afioga Hon Fiamē Naomi Mataafa (Lotofaga): Lau Afioga i le Fofoga Fetalai...

SUI FOFOGA FETALAI: Ou te vaelupeina le saunoaga a le sui usufono mamalu, malie le sui usufono o Lotofaga se i fai le tala a le Nofoa i le sui usufono o saunoa, ia ona e saunoa lea, faafetai.

E faalogo... ua faafofoga le Maota i lau saunoaga. E pau lava le tiute o le Nofoa, ia o le fesoasoani atu. O mataupu uma ua maea ona fai i ai faaiuga a le Maota lenei, ma ave i ai le ioega, malie sui usufono e le tatau ona toe taua. E na o le momoli o le faafetai ia ma agai i luma ia le lauga.

O le ala lena o le faatupu ai o manatu, ia ma toe lagalaga ai manatu ia ona o le toe taea atoa. Ae o le agaga o le Nofoa, e tau lava ina faapai ma momoli le faafetai ia ona agai lea o le lauga i tulaga e masani ai. E le na ona avatu o le fautuaga a le Nofoa, o le ala lea o le tau lagalaga o manatu, ona o lea o le a toe faatalanoaina le mataupu lea. O le mea la lea malie le sui usufono mamalu, e lelei ona faataatiaese o lea ua momoli lau faafetai, ia o le agaga lena.

Ae tuu atu le avanoa i le Afioga ia Fiamē Saofaapito se i saunoa.

Afioga Hon Fiamē Naomi Mataafa: Faafetai i lau Afioga i le Fofoga Fetalai. Ia maua le faaaliga a le Nofoa e tusa ai ma le mataupu ua oo i ai le saunoaga a le sui usufono. Ma e momoli atu ai le faafetai i lena faasilasilaga a lau Afioga.

Ae i tulaga o le tatou galuega, e na o le mea lava e fia faamalamalama pe faasao foi, aua e sao le saunoaga a le sui usufono o lea na fai le tiute o le Malo e faatu le lafo. Ae peitai, ua malolo le lafo, o lea la e saunoa mai le sui usufono ona o le finagalo o le Maota. Ae e tau lava ina ou faapea atu i lau Afioga i le Fofoga Fetalai, o ai le Malo? O le Vaega Faaupufai. O le Vaega Faaupufai o lo o pulea le tatou Malo, ma o lo o lava ia le latou fuainumera, e faamalieleina ai le manaoga o le Tulafono Faavae.

Ae peitai e pine ai foi la lea, ua maualuga atu le faaupuga lea e aumai e le sui usufono, o le aganuu ae tuu le Tulafono. E fiefia la le tulaga o le Malo,

ma le tau o le Malo, ae e le fiafia e faatino le tiute ua faatonu mai e le Tulafono Faavae. E na o le pau lea lau Afioga.

SUI FOFOGA FETALAI: Faafetai, manatu e le toe oo i ai se...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e i ai si mea e fia faasao.

SUI FOFOGA FETALAI: Ia, saunoa le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: E tatau ona ou faasaoina le sui usufono faatoa faamaui atu nei lona tootoo, matua sese i Sini lana saunoaga. E le i malolo le Malo na malo le Malo i le lafo ae e le i maua le aofai o le fuainumera e mafai ai ona faatino aiaiga o le lafo. O le faasaoga muamua lena.

O le faasaoga lona 2 se alala mai lalo se i uma ona faauma atu.

Afioga Hon Fiamē Naomi Mataafa: O le mea e fia faasao i luga o tatou Tulafono Tumau, o lau faauilavea, o le sui usufono lea sa saunoa.

SUI FOFOGA FETALAI: Malie le sui usufono o Lotofaga..

Afioga Hon Fiamē Naomi Mataafa: O le a le faiga lea e fai ai? E faataga e oe le Palemia e soli Fono?

SUI FOFOGA FETALAI: Malie le sui usufono mai Lotofaga se i taumafai atu se tala a le Nofoa. E manino lelei Tulafono Tumau, o le tiute o le Malo o le taumafai e faamanino se mea ua le malamalama, o le latou galuega lea. O lo o tapuai Samoa e fia manino ma malamalama i mea uma. O le ala lea ua ou manatu e tatau ona tuu atu le avanoa i le Malo, e aumai se faamaninoga leaga o lea ua e saunoa i le tulaga sa faiaina le Malo, i tulaga faaupufai.

E pei o le agaga lea o lea e tau tutu i ai le Nofoa, ae malie le sui usufono se i faamaea pea le saunoaga a le Taitai o le Maota, ia a i ai se mea e te fia saunoa ai, lea lava e tatala le avanoa ma le faaaloalo. Tulai mai le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Ua uma ona fai le iuga ma ua ou talanoa soo i le mataupu lea. Afai na palota ia le sui usufono i totonu o le Maota lena i luga o lana aiatatau, i tulaga o Tulafono Faapapalagi, sao

o lena e sao. Afai foi e palota le sui usufono i luga o le faamalumaluga faaleaganuu, o lena foi e sao. O le aganuu foi lea e faatino ai ia tatou Faigamalo. Afai foi na palota le sui usufono i le Fonotaga lea i lona talitonuga faakerisiano o le alofa o lena foi e sao. O lena la, o lea e alu uma lava mea ia i totonu o le Faavae.

E le faapea la o le fai mai o le Tulafono ua sao, ao le tu ma agaifanua ma le faakerisiano na faavae ai le palota a le sui usufono e sese. O le mea lena Fiamē, se i faataua ia le aganuu ma le faakerisiano.

SUI FOFOGA FETALAI: Faafetai, ia manatu lau Afioga i le sui usufono mamalu mai Lotofaga o lea ua manino lelei auofala ia e tusa ai o lau faauilavea ia ma le mea e fia faamalamalama.

Afioga Hon Fiamē Naomi Mataafa: Lau Afioga e talosaga atu, a faapea ua e faatagaina le Palemia e faasao au, ia o lea foi ou te tulai atu e faasao foi ia lana mataupu. I le itu lea e faapea e le i malolo le Malo. Faamolemole lau Afioga i le Fofoga Fetalai, o lea lava e manino lau Afioga ma le Maota, a oo loa i se mataupu o le Faavae, e manaomia le 2/3.

Ou te leiloa la po o fea le mea e aumai ai le fuainumera a le Palemia na faapea na malo le lafo a le Malo, leai na faiaina le lafo a le Malo.

SUI FOFOGA FETALAI: Faafetai o lea ua maua lou finagalo. Saunoa mai lau Afioga, tulai mai le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga o le faamalamalama, o le uluai saunoaga a le sui usufono lea na aumai nei, na aumai e le i malo le Malo. O le ala lea o lea ou te tuliloa atu ai upu, upu i le upu. Na malo le Malo, e 20 palota a le Malo, lagolagoina le lafo, ae 18 na tetee. I luga o le Palota na malo le Malo, ae le i ausia le 2/3 i lalo o le Faavae. O le Tulafono lea ou te alu atu ai, ou te le o alu atu i se isi mea, o lea ou te alu atu i le Tulafono. Ia faitau le Faavae, faitau le Faavae.

Afioga Hon Fiamē Naomi Mataafa: Lau Afioga i le Fofoga Fetalai...

SUI FOFOGA FETALAI: Malie le sui usufono o lo o tulai mai, lau Afioga i le Sa'o Faapito. Ou te tautala i le faaaloalo ona o le va nonofo o le Maota. Ae malie ua manino lelei ma malamalama tulaga o taualumaga o le Maota lena, o le Malo lava o le tali mulimuli lena i lo latou faamaninoina o mataupu uma. O le mea lea e faamalulu atu ai i le sui mamalu, i le tulaga o tatou Tulafono Tumau, ua ou faamutaina le talanoaina o le mataupu lea.

Afioga Hon Fiaame Naomi Mataafa: E faafetai i lau Afioga ua ou talia foi lau faaiuga, ae tautala taunuuga. Aua o le mau a le Malo, e faamalolo le Peresetene, o le a le mea lea e i ai nei, faatumauina le Peresetene. A alu la i fuainumera alu i taunuuga, e malolo le Malo.

SUI FOFOGA FETALAI: Malie le sui usufono mamalu...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E toe maua sou avanoa e faasao ai le mea lea, ona o tulaga e faaiu lava upu a le Malo.

SUI FOFOGA FETALAI: Ona talu ai ona o lea sa toe tulai mai le sui mamalu mai Lotofaga, malie o lea o le a ou toe tuu atua le avanoa e toe faamanino. Aua a 7 lava ni tou faauilavea, e 8 tali a le Malo. E tatau ona manino mai le mea lea, e le mafai ona tuufaua e le Faigamalo se mea e ao ona faamanino ma faaiu ai e le Nofoa. Tulai mai lau Afioga i le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga, o le mea lea ou te faasaoina, o le iuga o le Palota i fuainumera e malo le Malo, e 18 na tetea, ae 20 ia palota na malo ai le lafo. A o le faaiuga la, e le i mafai ona ausia le 2/3, o lona uiga la o le mea lena na ala ai ona tafea le lafo. Ou te le o agai atu la i le taunuuga, ae o lea ou te agai atu i mea manino, i mea faamaumuina. E 20 palota na lagolagoina le lafo a le Malo, i le 18. A fetuunai ia fuainumera, 1 e oo i le 17, 18, 19, 20, o lea ou te alu atu i mea faamaumuina lau Afioga. Na malo le Malo ae le i mafai ona ausia ia le aiaiga o le Faavae. Ma tatou te usitai uma lava i ai i aiaiga o le Faavae. O le mataupu lava faale-numera, e na o le pau lava le mea o le fesili, o fea le fuainumera e laititi? O le 18. O fea le fuainumera e tele? O le 20, ia ua uma.

SUI FOFOGA FETALAI: Ia e faapea lava uiga o toeaia o le Maota lenei, a o lea lava ua taoto i le agatonu ma manino lelei lenei mataupu. E momoli ai le faamalo ma le faafetai i sui mamalu uma foi na faaalua o latou finagalo.

Le sui usufono mai Vaimauga, se faasee ese ma mataupu ia ae alu pea i lau faafetai ma faaiu, o lea ua uma lou taimi.

Afioga Alaiasa Muagututi'a Moefaauouo Malagaitutogiai Sepulona Moananu (Anoamaa i Sasae): Lau Afioga i le Fofoga Fetalai, e na o se mea e fia malamalama ai i le lauga a le sui usufono o lo o saunoa nei. Ou te le oo i le mataupu lea na talanoaina. A o le saunoaga a le sui usufono i tama fanau a lona itumalo, o lea sa tu matila le latou auaunaga. E tasi lava le tama fanau lea na ou fia soso atu ai i le sui usufono, o le loia lea sa taua. E leaga

o lo o tau saili sau loia i le taimi lenei ae ou te le i aga atu i le faigapalota. O le mea lea ou te fesili atu ai i le sui usufono, o fea la e maua ai le loia lea. Ma le agaga faaaloalo.

SUI FOFOGA FETALAI: Ia faafetai mo le fia malamalama. E tapa le sui mamalu o Vaimauga i Sasae e faaauau le lauga, e le tau talia foi le saunoaga a le sui usufono mamalu.

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai, sa ou faapea e le faalavelave le Lufilufi. E mo le silafia o le Maota lenei, e 3 Lufilufi ia e i totonu, e 3 Moefaaouo ia e i totonu o le Maota lenei. E tasi le tama matua lea, 2 i le la e saunoa mai, 3 i o, le tama le la Palauli. Ae o le fesili leaga e tataua lava ona ou tali, leaga o lea e faafofoga le atunuu, ina ua leai ma ni cases i totonu o Samoa e toe faatino, o lea la ua i atunuu mamao. Ua agai atu i atunuu mamao i nisi cases e le i mafai ona faatino, e faatino e le tamalii lea, o le tali lena a Lufilufi.

SUI FOFOGA FETALAI: Faamaea mai lou taimi.

Afioga Alaiasa Muagututi'a Moefaaouo Malagaitutogiai Sepulona Moananu: E toe tasi lava si ou avanoa lea. E faafetai o lea ua ou malamalama ua malaga i fafo, ae sao le saunoaga a le sui usufono i le suafa Moefaaouo, ae na o au lava le Moefaaouo la e fai le tautua i le itumalo. Ma le faaaloalo lava.

SUI FOFOGA FETALAI: Ia malie ia le sui usufono mamalu o saunoa, e taatia ese ia mea faalotoifale ae faaauau le tatou galuega, aua ua maea lou taimi.

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai, e ala ona ou le alu i o, o lou alofa, aua a ou alu atu i o ua...

E tumu i le ava, e pei ona ou fai atu i le taeao, sa naunau lava lenei itumalo e faamaea ai, ae naunau tele ua alofa atu i le la talaga atoa i Afioga i Minisita. E leaga o lea e faatali le atunuu, ina ia pasiaina lenei Tala o le Tupe e faatino galuega. O le ala lea o lou fia tulai atu, ae o le a faauma le lauga.

Lou itumalo, o lea ua ave so tatou sao, ua ave le tatou faafetai i le Palemia ma le Kapeneta ma le Malo i tulaga sa amanaia ai le tatou sui usufono. Sa amanaia ai le faatauvaa e galue i totonu o le Palemene e ala i Komiti aemaise foi o tulaga i malaga faale-Malo i Fonotaga sa auina atu ai i fafo. Ia malo i lau Afioga i le Palemia ma le faatuatuaga sa i lenei itumalo.

Ae le i faamaea se tala i si ou itumalo, se i ou afe atu, e muamua ona ou faafetai i Matagaluega a le Malo, Ofisa sili o Pulega o Matagaluega ma

Faalapotopotoga Tumaoti. A silasila atu lenei Maota i lo outou afio mai, e ese le talavou o lo outou soifua, faafetai. O outou lava o lo o lima ma vae i ai lenei Faigamalo, malo le galulue, o matou nei a o outou taeao. O lea lava e manuia ia Samoa ona o la outou tautua, faamalo aveaveai faapea.

E toe afe atu foi lenei itumalo i le tapuaiga a le Aufaigaluega Paia a si ou itumalo. Ia faamalo le tatalo, faamalo le amanaia o lo outou sui usufono. O le tele lava o taimi e vaivai foi le tagata ia, ae malosi lava o la outou tatalo aemaise o si ou itumalo.

E faaiu se matou faamatalaga, le paia e i si ou itumalo, mai lava i si ou nuu o Lauili, i le afio o lau afioga le Saofaapito ia Salevalasi, lau afioga Leniu Viniu, o oe o le saolii o le Vaimauga, o oe o le alii oe o le Faleono, faapea le afio i ou alo aua Mapusua ma Fuamatu. Afio le afioga i le Matua i tofiga ia Taliulu aemaise le aiga paia o Salevalasi. Fai mai o le aiga sa o Salamasina, aemaise le mamalu ia te oe Tumua Tuisamau ma Ituala o le tupu. O lou nuu ou te faamemelo i ai, aisea? O le tuaoi lea o Atua ma Tuamasaga, fai mai na itulima ai Atua. O le ala lea o la le e taoto ai i o matou eleele, fai mai ua leai ni tane na o fafine. O le mafuaaga lea o le maua o sauafafine aemaise foi o le Manuatele, o le tuaoi lena o Mulivai Apouafasa. O lea lava e leo e le tatou itumalo aemaise o si o tatou nuu o Lauili. E so o se tuaoi lava e ave i ai tagata totoa, e ave i ai e mavae ai ma leoina le tuaoi.

O le mea lena lo tatou itumalo, e leai lava se mea o gase i le va o Faletuamasaga ma Atua. E omai omai lava Atua tau mai i i, Mulivai Apouafasa foi, e leai ma se mea e gase. E faatalofa atu foi i le paia, i Lalotea le malae o le faautugatagi a Tumua, e afio ai Tuliaupupu, fai mai o le foga oe o le Alataua. E fai mai a lafalafa lava tuna o oe o le Tuiatua o oe o le Malietoa. Ia faapea usolii aua Letautapilimai ma Faletagoai ae a le matua o Atuaia faapea foi lou tei alii aua Finai, o le isi foi alo o Malietoa, o Sasagaimuli. Aemaise foi alo o Tuliaupupu lau afioga Muliagatele, Tauilili, Tagaloatele ma Sulamanaia. Ae a lau fetalaiga Maotaua ma Fuatimau, fai mai o oulua o fofogamua o le Faletuamasaga. E fai mai e alofia lava le pulufana ae le alofia le susuga ia te oulua. Aemaise le mamalu ia te oe Tuisamau.

E faapea foi i si ou nuu o Vailele aua le Falefiaoalii, aua lau afioga Samoa ma Tavui ma Taufagaafa, afio foi le maopu o Savaiinaea. Afio le gataiala i lau afioga Ulumalautea Tofele ma Togia, aemaise nofoa i lau fetalaiga Lefau ma Tupuanai tuanofoa ia Lemanu, Lemanu aemaise le mamalu ia te oe Tuisamau.

Ia faapea foi i si ou nuu o Fagalii, aua lau tapuaiga i le afio o le alalatama ia Fuamatu aemaise foi o Tuisugaletaua ma Luamanuvae. Aemaise foi lau fetalaiga Pulemagafa ma oulua na talia le tanoa, nofo a ituaiga ma le mamalu ia Saleaupolu. Ua faamalo, ua malo le tapuai, faamalo le tautua faamalo le tatalo. O le a se mea ua oo i ai le mafai o le auauna, ia malu ave i fale. O a foi nisi galuega e le i faatinoina, ia e fai aso le Alii. A o le itumalo lenei, o

le itumalo e lagolagoina le Faigamalo HRPP, na faavae mai e nai o tatou tuua, o lea lava e mulimuli aao i ai. O le ala foi lea, o le a le mea e gase i o tatou eleele, e o mai lava o tatou e tutuliese ia tagata e pisapisao i eleele nei e pule ai tatou.

O le mea la lea lau Afioga i le Fofoga Fetalai ma lenei itula, lou itumalo e, ua ou toe afe atu e aumai faamanuiaga. O le sui usufono lenei e talanoa atu, o le Lauilii auuliuli lava, e le tau faatauana o le, o le tama o le Lauilii o le tina o le Letogo, o le matai foi o le afioaga o Vailele i le suafa Togia, o le tamalii o si o matou nuu o Vailele. A oo mai foi i si o matou nuu o Fagalii, ia e suafa Naeaulumanuaolevai o le vaimatai e tautuaina le paia i aiga.

O nai ou uso o le a matou tauva, ia e taaalo lava tama a o le uso. Ina ua tofofi e le Atua ia Tavita e fai ma tupu, na tofi mai lava le tama laititi. Ia nai ou uso o le a tatou tauva, aumai la outou faamanuiaga i le tama laititi, o lea lava e vaai mai ua toe faafoisia foi le isi malosi, e tautua ai ae faamalumu oulua.

Si ou itumalo, ia tapuai maia, o le a foi le tulaga e i ai le Filifiliga, ua leva ona uma ona tofofi le Palemene ma le Kapeneta a le Atua, ua uma. E pau lava lo tatou agaga e fia auauna lava le atalii. Ona faapea lea lau Afioga i le Fofoga Fetalai ma lena itu o le Maota, Afioga i Minisita, e faamalumu atu, o le tele o taimi e sopo loa, e naunauta ai foi la outou auauna. Ae le na o se manuia o lenei itumalo a o se manuia aoao pe a talanoa lenei sui usufono. E leaga e alofa i le atunuu, na amata mai lava i tua i le umukuka, sau ai lava sau ai lava, a lea ua oo mai a, o fuafuaga a le Atua. O mea e le i vaaia e mata e le i oo i ai se mafaufau o se isi, o mea na ua faia e le Atua mo e e alolofa ia te ia. O le a foi le tali a le Atua i le faiga filifiliga a le atunuu, e tofofi mai e le Atua ona taitai. O pule uma lava e mai le Atua, e pau le mea ia tatou maua le loto fefaamagaloi.

Ina ua aumai e Mose lona nuu mai Isaraelu, o le toatele ia o tagata na complain, faasea, o le a le mea na aumai ai matou, o la le e pae le meaai, pae, o mai isi, foi, na o mai foi isi, inu fao i le vai, inu fao, o le a le iuga? E le i oo tagata na i le nuu filifilia, leaga foi, e le i tatau ona o e inu, aua foi e oona. A uma loa ona inu le vai o Mara, ona e matamata lea i le matagofie o le Atua, maua le loto faamagaloi, e pau lava lena o le mea e fia vaai ai le Atua. Ae maua le loto faamagaloi ona e vaai lea i faamanuiaga e pei o le tetele o paina e 70. O faamanuiaga na e te maua pe a e maua le loto faamagaloi ma faagaloi. E le gata e 70 faamanuiaga ae 12 vaipuna e puna pea, e puna pea vaiinu na e le mafai na aveesea.

Lau Afioga i le Fofoga Fetalai, o le agaga lena, e puna pea, e puna pea ona faapea lea, a o le i faaiua le lauga, o le tele ia o sui usufono na ou faalogo, na fai a latou pese. Ae mataulia o le itumalo lenei, o le itumalo e o mai ai aufaipese e tautaua. E amata mai lava i Lauilii o Tama o le Liona...

SUI FOFOGA FETALAI: Ia malie le sui usufono ua uma lou taimi. E tatau foi ona e alofa mai i le Nofoa ma le galuega e le faigofie, e toatele outou ae toatasi au...

Afioga SULAMANAIA FETAIAI TAUILILI TUIVASA: Tama o le Maalila ma Letogo i le Fauula, tama o le Agalologo, oo mai i Vailele i le Punialavaa, Mafoa, oo mai i Fagalii i le Maatulua ola, Papaigalagala. O lea la, ua ou valaau atu i lau Afioga, ua uma le lauga, a o le Maota atoa lenei, e i ai na i ou sui faale-tulafono. E pei o le agaga lena, o ou uso faale-tulafono. Na ou fai atu foi i le amataga, o le itumalo lenei e fia o uma lava i ai tama aua e aulelei ia teine.

Lau Afioga i le Minisita ma outou o ou tuafafine o outou aiga, o le a fai le tatou pese. Ae valaau muamua atu, o lau Afioga Laauli lou uso, o lou Afioga Loau o lou tuafafine, lau Afioga Fata Sala Pinati, o le isi ou tuafafine, ia lau Afioga...o lea e le o i ai le Gafatasi, ia e faaiu atu i le tama matua, le afioga i le taitai o papa. O le pese o le a faaiu ai le lauga a le Vaimauga. O le pese lea na tusia e lou uso, kasene, Lale Peteru o le susuga i le faafeagaiga. Fai mai e te le tuua au, mafua i se a? E faigofie ona mafuta ae faigata ona tetea.

SUI FOFOGA FETALAI: Ona o toe lauga o le Paeaiga....Ua lava se fuaiupu se tasi...

Afioga SULAMANAIA FETAIAI TAUILILI TUIVASA: E tusa lava pe e te le tulai mai, aua a e le tulai mai ou uso se i tulou lea e nonofo i ou tuafafine, e oo atu i le fale, ua taatia mai lau ato i le faitotoa, leaga o la e faalogologo mai ou tuafafine. “Ae e te le i tuua o ou toe manatu fia momoli atu. Tausaga o i luma ma ni mea e tutupu ai. E pau lava o lou manatu ma na i so o se mea ou te mafaia. E pau lea ou te ofoina atu au nei mo oe. O le a leai se fale i luga o le mauga ma se faatauvaa taua. E leai foi ni ofu leaga e te toe laei Mea uma e tu mai pea i ou luma, ina ia e iloaina. Pau lea ou te ofoina atu au nei mo oe.” Papa.. Papa.. tatala mai, ona o le suafa o Iesu, Amene.

Na faaalua le agaga fiafia o le Palemene i le patipati o latou aao i le maea ai o le saunoaga a le sui usufono mo Vaimauga Sasae.

SUI FOFOGA FETALAI: Se i tulai mai le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: A silasila mai ou te le i pese. E tasi lenei tagata o le Vaimauga e matua paulua tele le leo. Ae na ona ou faamanatu i nisi e le i saunoa, e i ai foi le pese faapea faamavae na fai e

isi i le Nofoaiga talu ai. Na uma atu lava ma le toe omai ai. Ia tatou faatofa pea ia te oe ma lau pese.

Susuga Hon Laauli Polataivao Leuatea: Lau Afioga i le Fofoga Fetalai, si mea puupuu lava lea. Sa ou musu lava e faalavelave i le saunoaga a le sui usufono. Ioe, talofa e Sula, se ua toe sasi lava ua uma lau lauga manaia. O au faamanuiaga na, e alu lava Tuliaupupu i le lagi, o fai mai e tautuana oe. E le i faigofie le asaasaina o lou tofi, a o oe o le tagata valaauina. Ae fai mai Tofilau ina ua tu mai le HRPP, tofa soifua.

SUI FOFOGA FETALAI: E manatu o lenei laolao e fia momoli le faamalo ma le faafetai i taga foi o lenei vaega o le tatou Fonotaga. E faamalo i sui usufono mamalu na saunoa, sa i ai le manatu e fia... a o lea ua manaia lau pese, ua fai lava lea ma faafetai a le Nofoa mo le saunoaga matagofie a o faafofoga le itumalo.

E i ai le agaga o lea e tele lo tatou taimi, o le avanoa lelei foi lenei mo se isi sui usufono e fia saunoa e tusa o le Tala o le Tupe e pei ona faataoto i le Maota.

Tulai mai le sui usufono mamalu o Falealili i Sisifo.

Tofa AUMUA ISAIA LAMEKO (Falealili i Sisifo): Lau Afioga i le Fofoga Fetalai, faafetai mo lou avanoa i lenei itula o le aso. Ua malumaunu le Fogatia, aua ua atoa alii seu ma o latou soa seu. Ua sausaufialele le manu sa moe afusia, aua e faigata Samoa o le fue e lavelave. A o se ia mai moana, aua e ifo tonu foi le fuiniu i le lapalapa. O lupe lava sa vaoeseese a o lenei ua fuifui faatasi i le alofa ma le agalelei o le Atua.

E le galo lava Afia i si ona vao, e na ona ou pai lava i si ou uso, le Afioga i le sui usufono mo Lefaga ma Faleaseela, lau Afioga i le Fofoga Fetalai. Le Afioga ia Vaafusuaga Toleafoa Ken Poutoa, o se tasi o uso matou te nonofo faatasi i inei. Aue ua maliliu toa ua maumau ai auupega o le taua. Talofa e, i si ou uso ua faamanava e le Atua ana galuega, ua fai i lagi le folauga. Le auauna lelei e ma le faamaoni, ina ulufale maia i le fiafia o lou Alii, ia maua sou nofoaga mau i le lagi. Ia faamaise le Agaga o le Atua i le faletua ia Vaelaa Molioo Poutoa, le afafine ia Uini Poutoa, faapea le uso ia Tuiafetea Ulugia Simi Poutoa ma si ou tuafafine ia Taua Easter Poutoa ma o tatou aiga uma, aemaise le itumalo o Lefaga ma Faleaseela.

E faatalofa atu i lenei taeao, e faatalofa atu i lau Afioga i Le Ao mamalu o Le Malo, lau Afioga Tuiaana Tuimalealiifano Vaaletoa Sualauvi II ma lau masiofo. E faatalofa atu i lau Afioga i le sui o le Fono o Sui Tofia, lau Afioga Le Mamea Tuiletufuga Tapusatele Ropati Mualia ma lou faletua.

E faatalofa atu foi i lau Afioga i le Palemia, lau susuga Tuilaepa Auelua Fatialofa Auelua Lupesoliai Neioti Galumalemana Aiono Dr. Sailele Malielegaoi ma lou faletua. E faatalofa atu foi i Alii ma Tamaitai Minisita o

le Kapeneta faapea Minisita Lagolago. Ou te faatalofa atu foi i sui usufono mamalu o le Palemene ua potopoto i lenei itula o le aso. I le afifio o Taitaifono faapea ia sui usufono o Samoa. E faatalofa atu i lau Afioga i le Faamasino Sili, Satiu Simativa Perese, o le sui Faamasino sili, faamasino sinia o le Faamasinoga o Soligatulafono a Samoa. E faatalofa atu foi i lau Afioga i le Peresetene, Fepuleai Ropati Attila ma le faletua, o sui Peresetene, o sui sinia, o faamasino o le Faamasinoga o Fanua ma Suafa o Samoa. E ofo alofa atu i lau Afioga i le Fofoga Fetalai, lau Afioga Leaupepetele Taimaiono Toleafoa Faafisi ma lou faletua. E faatalofa atu foi i lau Afioga le sui Fofoga Fetalai, po o le Fofoga Fetalai o lenei aso, lau tofa Nafoitua Talaimanu Ketu ma le tausii.

E faatalofa atu foi i le paia ma le mamalu o auauna a le Atua, i so o se Fatafaitaulaga i Samoa, o lo o faafalelemalu i lea afioaga ma lea afioaga i si o tatou atunuu. E faatalofa atu i Pulega a Alii ma Faipule, Komiti Tumama a Tina, Saoao ma Tamaitai ma le Malosi o le nuu aemaise o fanau aoga ma se ua aupito itiiti i so o se afioaga.

E faatalofa atu foi i le mamalu o le aufaipisinisi tumaoti i so o se vaega o Samoa, o Ofisa Sili o Matagaluga ma Faalapotopotoga a le Malo, le aufaigaluga i so o se matata, ma tomai ua tofia ma galulue ai. O le paia lava lea o Tama ma o latou Aiga, o Aiga ma a latou Tama, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

E faatalofa atu foi i le Malo o Tutuila ma Manua, i le susu o Sua ma le Vaifanua, Fofu ma Aitulagi, Saole ma Saleaamua ma le Launiu na Saelua ma upu i le Manuatele.

O lenei taeao lau Afioga i le Fofoga Fetalai, ou te ofo alofa atu foi i le paia ma le mamalu o si ou itumalo o Falealili i Sisifo sa i ai i le tausaga e 2016. Ona o reforms a lo tatou Malo e faatatau i itumalo faapalota, o lea ua sui ai le igoa o le itumalo ia Falealili Nu 1, i le 2021.

E faatalofa atu i Susuga i Faafeagaiga i Fatafaitaulaga e fia o lo o faafalelemalu i si o tatou itumalo. E amata mai i Lalofau ma Leatumalama seia paia Falepunaoa. O le ekalesia Mamona i Saleilua, ekalesia EFKS i Saleilua, ekalesia Aso Fitu o lo o nofoia le fanua o le Malo i Togitogiga i Saleilua, le EFKS i Poutasi, o le ekalesia Katoliko i Poutasi. O le ekalesia Mamona i Vaovai, EFKS i Vaovai, le EFKS i Matautu. O le ekalesia Metotisi i Tafatafa, ekalesia Mamona i Tafatafa, le ekalesia Jehovah's Witness i Tafatafa. O le ekalesia Metotisi i Malemalu, EFKS i Malemalu. Le EFKS i Satalo, le ekalesia Mamona i Satalo, le ekalesia Papatiso Manumalo i Satalo, le ekalesia Metotisi i Satalo. O le Ekalesia Faapotopotoga a le Atua le Assembly of God i Satalo. O le ekalesia a le Worship Centre i Sapunaoa, EFKS i Sapunaoa, le ekalesia Mamona i Sapunaoa, le ekalesia Aso Fitu i Sapunaoa, le ekalesia EFKS i le pitonuu i Piu i Sapunaoa, Ekalesia Asofitu Tutoatasi i Sapunaoa.

E faatalofa atu foi i le paia ma le mamalu o ou aiga uo ma e masani i itu e fia o Samoa, i le Pasefika o Niu Sila o Ausetalia o Amerika Samoa ma Amerika. E faatalofa atu i si ou nuu i Saleilua ma Iiili. Ua paia Lalofau ma Leatumalama e afio ai le Tamaitai o Leilua ma le toa-fa o tamatane. O Touli, Tapu, Lealiiiee ma Asuao. Afio le matua ia Fanene, afifio usoalii Tuulau, Siiliili, Pogi, Saotiiti ma Faleupolu.

E faatalofa atu i si ou nuu o Poutasi Ua paia Poutasi ma Fagamalama e afio ai alii sao. Afio Tuatagaloa o le Sao Fetalai, o le Tooosesavili o le ki o le malo. Afio mai Meleisea o le sao aualuma, afifio mai alo o Fanene ma usoalii. Alaalatai Lufilufi ma Taulauniu.

E faatalofa i si ou nuu o Vaovai. Ua paia atoatoa Sogimaa e susu ai le Tapaau Faasisina ia Tuisamoa ma le usoalii, Misaoi, Sogi, Teo, Soi ma Falanai. Alaalatai le mamalu ia Lufilufi ma le toa-valu o Taulauniu, Vaatilalua, Fonoti, Lauulu, Faamanu, Pologamanaia, Luaoa, Vaetuiafiafi ma Lealiifano.

E faatalofa i si ou nuu o Matautu, afifio mai Salevalasi lau afioga Matautia ma Tupuola, afio le matua ia Tiavaasue, susu mai le usoalii, Alaga, Gauta Sailivao ma Tia. Maluu mai le alaala itumalae, Nai, Pinofoga ma Gauta ma le nofo a tulafale.

O si ou nuu pele o Tafatafa, susu mai oulua suafa o Saleā ma Saoleititi, afio mai le matua ia Alaimoana ma le aiga sa Alaimoanā, ma le tala o le fale o Manusamoa.

Talofa i si ou nuu o Malaemalu, afio mai Talauega, o le alii o aiga, afio mai Pulotu o le alo o Tuatagaloa, maluu mai Falealilimuli.

E faatalofa atu i si ou nuu o Satalo. Ua paia atoatoa Falefasa o le afioaga o Teo ma Fonoti ma le usoalii. Mamalu lau fetalai i le sa'o o le Tuiatua, lau fetalai Talooemaagao ma lo outou aiga Sa Talo ma le Matua, ae a Salelea ma le Lautinalaulelei.

Ae faamuli sau faafetai ma sau faatalofa i si o matou nuu o Sapunaoa. O le nuu nei e 3 pitonuu o Faleulu ma Tulasoo, Sapunaoa ma Piu. Ua paia atoatoa Falepunaoa e alaalatai ai le mamalu i lo outou Toafa, Maelopa ma Leavasa o Tootoooleaava, Tuiloma ma Taituuga, o Manu o le Tuasivi e fagogota i tai e 2, le Usoalii ma le lotofale o le Fale Manusamoa. O le paia lava lea ia Alaalagafa, la oulua Nofo a Tulafale ma le Tauagaeseese ia Falealili.

Faafetai atu i lo outou tusiaao ma le valaauina o au i leni 5 tausaga, o le Paeai Lona XVI a le Palemene e fai so outou leo i le Palemene o Samoa. O lou manatu, e le o se nofoa e faalue ai se isi po o se nofoa o sona aiga, o le nofoa leni o le ta itumalo mo upufai o Malo, lea o lo o avea ai au ma a outou auauna, e sailimalo, galue ma le faamaoni, e le faalogologotiga, e le augata, e augofie, e laufofoga fiafia, e fesoasoani i so o se tagata. E tatala foi le tofasaili mai e matutua ma ao sinasina o si o tatou itumalo. Fai mai e tatala le tofa ma le faautautaga i a tatou faiganuu lelei ma le malamalama, ma e tualalo foi ina ia maua avanoa o tagata agasala i a tatou faiganuu, e iu ai le

finagalo autasi o alii ma faipule i se mataupu ua talanoaina. A maea se galuega ona matou faapea lea, o matou o auauna le aoga.

Faafetai i la outou faaeaea, faafetai i lo outou titi faitama, faafetai i la outou tapuaiga, o la outou tatalo, o lo outou alolofa, o lo outou gapatia. Faafetai i lo outou timuia ma le laina i le ala, o lo o outou feulaina le mulila ma taumate pe tua ma ni a le galuega a lo outou atalii, o le tama o le eleele i le Fonousu a Samoa i Tiafau nei. Faafetai, faafetai, faafetai tele lava. O lou talitonuga, o le tagata ma lona aiga, o le tagata ma lona nuu, o le tagata ma lona faasinomaga.

Lau Afioga i le Fofoga Fetalai, o le a fai ni manatu aua le Tala Faatatau Faaopopo (Nu.1) o le Tupe 2020/2021. O le manatu autu o le Tala o le Tupe lenei i lou lea talitonuga, a aulia taeao, manatua le aso, a aulia taeao, manatua le aso sa faatino e le Fono Aoao a Ekalesia Soofaatasi sauniga o le tatalo ma anapogi mo Samoa ma sa outou sii le viiga ma le faafetai i le Atua i Lona agalelei ia Samoa. Ma o le alofa faa-tama o le Atua na ia le tuulafoaiina ai tatou. O le faafitauli o ananafi, e aoao mai ai le aso, ae faatonufoalau ai taeao. A aulia taeao, ia tatou manatua le aso. O galuega sa talosagaina ai le Malo e tauala atu i Minisita o le Kapeneta, sa tuitui, sa fai le tusi, sa savalivali i ai i Afioga i alii ma tamaitai Minisita, e tusa ai ma galuega a si ou itumalo o Falealili Nu.1 po o Falealili Sisifo lenei o lo o i ai i lenei Paeaiga. E pei o lenei, sa matou talosagaina le faia o le auala galue i Lealamutu i Sapunaoa, sa faapea ona faatino i le Paeaiga Lona XIV a le Palemene, a o tulai mai o matou matua i le tofi o Falealili.

Sa matou talosagaina le tanuina ma le faia o alavai fou mo le auala fou i gauta o Sapunaoa, lea sa suaina e se tasi o alii faifeau, le Susuga ia Matau Pisimaka Tamati. O le auala lea e faaigoa o Lealatele, ina ia mafai ona oo atu ai taavale mo le lauina mai o le talo mo le maketi o le talo faafulisa po o le talo vavalu i Ausetalia.

Sa matou talosagaina le suaina, tanuina, valitaina o le auala galue e tau o Lealasopo. O le auala lea o Lealasopo, e tu tonu lava i le pitonuu lea sa taua muamua e le Taitai o le Maota, o le pitonuu o Piu. O le pitonuu o Piu, o le pitonuu o le nuu o Sapunaoa, e agai atu ai i le vai o le Malo lea o lo o i ai nei i Sapunaoa, lea sa talosagaina ai le fausiaina o se auala laupapa sima po o le ford ina ia faapena ona feoi ai taavale i gauta o le pitonuu o Sapunaoa. Sa faatinoina le polokalame a le Matagaluega o Faatoaga i le manu ainiu i Sapunaoa. Faafetai i lau Afioga i le Minisita ma le Matagaluega sa tuuina mai ai le iliafi mo le faalaloina o niu ina ia faapena ona tineia le manu ainiu. Sa faapena foi ona faamanuiaina si o matou nuu i le stimulus package lea sa toe aumai ai niu mo le toe totoina.

Sa faatino le polokalame a le Matagaluega o Faigafaiva i le gafaifale mo le faaolaina o amu, faisua ma le aliao. Fausia faamaea o le taligalu i se vaega mai le fale komiti i Sapunaoa seia paia le tuaoi ma Salesatele ona ua amata lofia eleele i le suiga o le tau ma le tai sua.

SUI FOFOGA FETALAI: Malie le sui usufono o saunoa se i tuu atu lava le avanoa i le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o se mea lava e fia malamalama. Ou te faafesili atu i le auala lea i Piu, ona o Piu sa tele lava le faaletonu o le latou auala sa i ai ma le tulaga o le vai. Ae talu ai ona tasi lenei afioaga o lea sa faia ai le galuega tele ma le atinae a le Malo, e fai lava si maouta, e sau ai le vai mo Falealili. O lona uiga la, o le isi nuu lea o lea e faamanuiaina i le tele o atinae. E oo foi la i le tulaga lea na fai ai le iuga mo le renewable energy. O lona uiga o le fausia lea o se faiga fou e maua mai ai le eletise e mafai ona faamumu ai nisi i ina ae faaaoga ai le susunuina, aemaise le vao lava lea o mea o ituaiga laau nei o le invasively species, lea e oo lava i fue, tatou te vaai atu lava i luga o niu ua sosolo atu fue ma iu ina pepe ai niu. E feoloolo lava la le tulaga o le faataua o le nuu lea o Piu, ona e le gata e alu atu ai le auala e alu i uta mo le vai, ae o le tulaga foi la i le taoto o le laueleele, e taua tele mo faatoaga.

A o lea la ua e taua, ou te faafesili atu, o a mai la Piu? O lelei pea le vai lea po o i ai se tulaga ona o lea ua e toe laga ma le isi lea poloketi a le Malo mo le renewable energy i le fausia mai lea o le eletise e faaaoga i ai mea o laau nei e sosolo e tau o mea o laau e leai se aoga na ola ai, a o lea e faaaoga i ai le isi lea metotia e fesoasoani i le viliina o le tatou suauu. Ou te fia malamalama lava po o le a le tulaga o i ai Piu? E faapitoa lava mo Piu, ona o lea ua e taua o i lea e oso atu ai le tou auala galue e agai i uta?

SUI FOFOGA FETALAI: Ou te tapa le sui usufono mo Falealili Nu.1 se i saunoa e tusa o le mea e fia malamalama i ai.

Tofa AUMUA ISAIA LAMEKO: Faafetai i lau Afioga i le Fofoga Fetalai. E pei ona taua e le Afioga i le Taitai o le Malo i le tulaga lea i le pitonuu lea o Piu, o lo o lelei atinae ia o lo o fai ai, e pei o le atinae lea o le renewable energy lea o lo o faaaogaina ai lau o le fue ina ia faapena ona maua ai le eletise. Na pau le tulaga e i ai, e le tele le poloketi, o lona uiga, e le toatele nisi e faapena ona ola i le eletise. A o le pitonuu lenei o Piu, o lo o ola i le eletise lea, e aunoa ma le eletise o le Malo i le taimi lenei.

O le faatanoa vai foi, o iinei lea e feinu ai Falealili atoa lea e alu i le itu i sasae ma le sau agai i le itu i sisifo i le vai lenei.

Na pau lava le tulaga lea sa ou talosagaina, e le i taina le auala, o lea e pefu lava le auala i le taimi lenei. O le mea foi lea o lea e talosaga ai le auala laupapa sima lea po o le ford ina ia faaleleia le auala lea e alu agai i gauta i Piu. Ma le agaga faaloalo.

SUI FOFOGA FETALAI: Se i tulai mai le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaoi: Lau Afioga, o gafea tonu lava lea e le i faataina? I le alu atu lea i gauta ae faapefea le alu atu i Piu, o ta?

Tofa AUMUA ISAIA LAMEKO: Lau Afioga i le Fofoga Fetalai, e le i ta le alu atu lea i Piu, na o gauta lava o Sapunaoa lea e ta ai le auala galue lea, ona alu sao lava lea i Lealamutu. O i la i Sapunaoa, e afe loa le auala lea e alu i Piu, o le auala la lea e faaigoa o Lealasopo, o le auala la lea e le i faataina e oo mai i le taimi lenei. Sa talosaga foi i taimi ua tuanai...

Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaoi: Ua lelei, o lea ua ou malamalama. O le mea lea sa ou fia malamalama ai ona o Falealili, e le o se tamai nuu, o le nuu tele e oo foi la ia Sapunaoa i le tulaga o fesoasoani o lo o faatino nei e le Malo, e i ai atinae e fitoitonu lava i le nuu e pei o aoga, faleaoga mo le nuu e tasi. E pei la o le mea lea o le vai, le vai. E pei foi o le tulaga lea i le eletise. Ae manatua mai la, e le itiiti ifo i le 2,000 le tele o pitonuu, a o pitonuu foi o nuu, o nuu mavae. E i ai la fesoasoani a le Malo e pitoa lava i le pitonuu e tasi, e i ai le fesoasoani a le Malo e pitoa i le nuu, e le na o le pitonuu. O lona uiga, o le pitonuu ma le nuu atoa. E i ai le fesoasoani e manuia ai le itumalo, e 2 pe 3 itumalo e pei o le vai la lea e sau i i, ae inu atoa ai Falealili. E i ai atinae e manuia ai le atunuu atoa e tai pei o le malae vaalele. O le malae vaalele la, e i ai foi la ma atinae e manuia ai Savaii ma Upolu.

E ala la ona ou taua le mea lea, ona e i ai ituaiga fesoasoani e alu atu faapitoa i le nuu, o le pitonuu. E i ai le fesoasoani e alu atu e kava ai le pitonuu ma le nuu tele e tai pei o aoga. Ae i ai foi le fesoasoani e kava ai le itumalo atoa e pei o le falemai i i Poutasi. Ae i ai la le ituaiga atinae e fesoasoani ai ia Piu ma le tou nuu e felelei ai i Niu Sila vaalele ma le malae vaalele. E le mafai la ona faapea o le malae vaalele, o le malae vaalele o Satapuala, o le malae vaalele o tatou uma.

E ala ona ou fai atu le mea lena, e oo lava ia Amerika e pei ona fuafua a latou atinae, e le mafai ona faua Roma i se aso se tasi, e fau faasolosolo. O lona uiga la, o mea o fesoasoani nei e avatu, o la e manuia ai le atunuu atoa. E le mafai la ona faapea mai, e le i maua lava e Piu se fesoasoani a. E pei foi o le malae taalo, lele ua leva ona fai le malae taalo e kava atoa uma ai Falealili, o le a le mea lea e i ai? Femisai i latou e vaaia malae taalo. A o le tulaga lea ua taua tele lau faasalalauga lea ua aumai nei ona o le vai lena i uta, o lea e inu uma ai, a o si vaega la lea o le auala i le agai atu i gauta, o le mataupu la lena ou te lagona o lea e i le tatou polokalame, e faapena ona fai

faasolosolo. A faapea ua manuia lou itumalo i le isi mea, ia lea nuu i le isi mea, a o la e kava mai le isi mea.

Ia, e faapena mea o faiga foi ia faalautele i lea itumalo ma lea itumalo, ae taua tele lau upu lea na aumai, leaga o Falealili Sasae ma Falealili Sisifo, o ni itumalo tetele tele lea o Atua.

SUI FOFOGA FETALAI: Faafetai mo le saunoaga manino a le Afioga i le Taitai o le Maota.

Ia, ou te tapa lau Afioga i le sui usufono e faaauau lau saunoaga.

Tofa AUMUA ISAIA LAMEKO: Lau Afioga i le Fofoga Fetalai, e momoli atu le faafetai tele i le Taitai o le Malo mo le faamalamalamaina o le vaega lea i mea tau vai.

I lo matou nuu lava i Sapunaoa, ia, o lo o i ai se tasi o malae fava-o-Malo, malae lakapi i le matou nuu i Sapunaoa. I tausaga ua tuanai, sa faapena ona fesoasoani i ai le Matagaluega o Aoga ma le Malo. O le itumalo lenei o Falealili Sisifo po o Falealili Nu.1, e 3 lava malae taalo fava-o-Malo la e i ai i le taimi nei. O lea sa ou tatalo foi isi ou uso lea mai Sasae e avatu latou lakapi e fai i se tasi o malae o le matou itumalo aua o matou lava le itumalo e tasi. O le malae faava-o-Malo i Sapunaoa, o le malae faava-o-Malo i Vaovai ma le malae faava-o-Malo i Saleilua Falealili. O malae tetele ia e tolu sa faapea ona tapena i ai afioaga ae le gata i lea o le fesoasoani a le Ofisa o Aoga, e mafai ona faaoga so o se polokalame, e le gata i taaloga lakapi, ae faapena foi isi taaloga e pei o taaloga soka.

O nisi o galuega sa faapena ona talosagaina, sa talosagaina le faaleleia o le auala lea e faaigoa o le Tsunami i si o matou pitonuu i Faleulu ma Tulasoo. O le auala lea, e oso tonu lava le auala lea i tafatafa o le faleaoga a le Aoga Tulagalua i Sapunaoa e alu agai i gauta. O le auala lea sa faaoga ina ua oso le Tsunami ia Setema o le 2009, o le auala lea sa faaoga e tamaiti aoga e o ai agai i gauta. Sa faapena ona talosagaina e alii ma faipule i le 2017 le tatou faalapotopotoga o le CSSP na aumai ai se vaegatupe e \$50,000 sa faapena ona lauina mai ai uta o maamaa ina ia faapena ona tanu ai le auala lea e faafaigofie ai le feoai o fanau aoga i si o matou pitonuu i Faleulu ma Tulasoo. E faafetai atu ai i le CSSP mo lea galuega taua ua mafai ona feoai ai alo ma fanau, ae le gata i lea, ua mafai ona feoai ai taavale i le taimi lenei. Atonu o le lumanai, ua uma foi ona tatalo i le Afioga i le Minisita o Galuega mo le suaina o alavai, ae le gata i lea o le faaleleia o le auala lea. E tele lona aoga e tau mai... o le auala tonu lava lea e tau i le auala galue e alu i gauta o Sapunaoa ma oo atu ai i si o matou pitonuu i Piu.

O si o matou nuu o Satalo, ina ua faatupulaia le Tsunami o le 2009, sa faapena ona agai i uta le toatele o tagata sa nonofo i tai, lea la e i ai le auala fou lea e faaigoa o le Tsunami, e oso tonu lava le auala lea i tafatafa o le falesa Metotisi i Satalo e alu agai gauta, o lea ua i ai nei le falesa fou a le

Faapotopotoga a le Atua po o le Assembly of God i Satalo. O le auala lea e manaomia foi lona faaleleia o lea ua maea ona ave le talosaga.

E i ai ma le isi auala, o le auala e muta le auala lea, e taua o Lalovai i Satalo, e manaomia lona suaina ma le tanuina. E pei o vaega ia o auala ia o lo o talosagaina, e le o talosagaina le valitaina ona o le utiuti o le faasoaa le tatou Malo, ona o lo o ave le faamuamua i le tatou Koviti, mo le puipuiga o le soifua maloloina.

Faafetai foi i le Matagaluega o Faatoaga i le tuuina mai o le iliafi mo le matou nuu i Satalo mo le polokalame o le tineia o le manu ainiu.

O le matou nuu i Malaemalu, e momoli atu le faafetai tele i le Afioga i le Minisita o Faatoaga sa aumai ai iliafi mo le polokalame lava lenei o le manu ainiu. I si o matou nuu i Malaemalu, ua uma ona ave le talosaga ina ia faapena ona suaina ma tanuina ma faia alavai mo auala galue i Malaemalu. O le auala lea e i tafatafa o le Ekalesia Metotisi i Malaemalu, e leai lava sona umi tele agai i gauta ona o le vai lea o lo o tafe mai ai.

E i ai se tasi o vai po o vai ia e faaigoa o vaieli i gatai o Malaemalu. I le taimi nei o lo o i ai le auala. O le auala lea sa fesoasoani mai ai se tasi o tamalii i le Aiga i le Tai le afioga ia Mulipola, ua toe taliu i Ausetalia. O se tasi lea o tamalii sa fai le latou feafaatauaiga ma le nuu o Malaemalu mo le lauina o le oneone ae sua le auala. O lea la ua i ai le auala i le taimi lenei, ae manaomia lava lona toe faaleleia e agai i le vai lea e faaigoa o Punaotala.

SUI FOFOGA FETALAI: Ou te vaelupeina le saunoaga a le sui usufono mamalu mai Falealili Sisifo po o Falealili foi Nu.1, talu ai ona o lea ua tatou taunuu mai i le taimi faatulagaina e faamaea ai galuega a le Maota mo lenei aso. E momoli atu ai le faafetai tele. Ua tau i tau le lauiliuina o le tofa ma le faautautaga a le Maota i lenei aso. E i ai foi le manatu o le Nofoa, ua oo lava i ooooga, ua faafofoga foi Samoa aemaise o itumalo mo e na lautogia i lenei aso i a latou lauga. E toe fia momoli atu ai le faamalo ma le faafetai, malo le tapena, malo le onosai e pei ona valaauina ai lo outou mamalu o sui usufono filifilia o itumalo taitasi.

E i ai foi le lagona o le Nofoa, e i ai taimi e siisii ai, ae vaatele i lo outou finagalo le paia e o le Maota. O le agaga o le Nofoa ia ulimasao ma toafimalie mea uma ma taunuu ai i le manuia i lea aso ma lea aso e pei ona i ai foi lenei aso.

Ona i ai lea o le agaga e fia momoli atu le faafetai tele i lo outou manatu mai foi i le Nofoa i le tulaga o le faafoeina o le tatou galuega aua se manuia o le tatou Fonotaga.

Ia, e i ai foi le lagona, a tuuama le fua ma taape le filialii, ia malaga ma le finagalo o le Atua, malaga i lagima, tautai le Atua i ala uma o le a uia i lenei aso. O upu masani lava, e pipii tia ae mamao ala, e i ai foi lavelave o le ala, ae agalelei le Atua, tautai lo outou soifua le paia e o le Palemene, tatou toe aulia lena aso fou o muamua e faaauau ai galuega a le Maota.

Ae tatou te le i malolo mo le tolopoina o le tatou galuega i lenei aso, ou te talosaga atu i le sui usufono mo Safata Sisifo e te faaiiina le tatou Fonotaga i se tatalo.

Na motusia felafolafoaiga ina ua tolopo Taulumaga a le Fono Aoao Faitulafono i le itula e 1:02 i le afiafi seia aulia le Aso Tofi, 28 o Ianuari 2021 i le itula e 9:00 i le taeao.